



Greenland Minerals A/S

## **Aatsitassarsiornissamut akuersissut 2010-02 tunngavigalugu píiaanissamut akuersissummik qinnuteqaat pillugu aalajangiineq**

01-06-2023  
case no. 2023 - 4265  
doc. no. 23011166

### **AALLAQQAASIUT**

PO Box 930  
3900 Nuuk  
phone (+299) 34 68 00  
E-mail: asn@nanoq.gl  
www.govmin.gl

Greenland Minerals A/S-ip (matuma kingorna "GM") Kalaallit Nunaata kujataani Kuannersuarni píiaanissamut akuersissummik qinnuteqaataa 17. juni 2019-meersoq pillugu suliami aalajangiinissamut paasissutissat pigineqartut naammattut, allakkani 5. maj 2022-meersuni allassimasutut Naalakkersuisut naliliipput.

Naalakkersuisut matumuuna nalunaarutigisinnaavaat qinnuteqaat 17. juni 2019-meersoq naammassillugu suliarineqartoq. Naalakkersuisut aalajangiinermi matumani GM-ip píiaanissamut akuersissummik allatut ilusilimmik qinnuteqaataa 16. december 2022-meersoq isummerfiginngilaat. Naalakkersuisut suliami paasissutissiineq naammassippat sioqqutsisumillu tusarniaasoqareerpat, tamanna pillugu immikkut aalajangiissapput.

### **PIIAANISSAMUT AKUERSISSUMMIK QINNUTEQAATIP ITIGARTINNEQARNERA**

Naalakkersuisut Kuannersuarni suliasamat píiaanissamut akuersissummik qinnuteqaat 17. juni 2019-meersoq itigartinneqartoq nalunaarutigaat.

Aalajangiineq inaarutaasuvoq aammalu allaffissornikkut oqartussamut allamut naammagittaalliuutigineqarsinnaanani. Aalajangiineq ulloq manna aallarnerfigalugu ukiup ataatsip qaangiutinnginnerani Kalaallit Nunaanni Eqqartuussivimmuut siullertut suliaqartussamut suliaqqiunneqarsinnaavoq, takuuk aatsitassanut ikummatissanullu inatsimmi § 3 d, imm. 1 aamma 4.

Matuma kinguliani tulliupput suliame paasissutissanut pingaarnerpaanut nassuiaatit kiisalu itigartitsineranut tunngavilersuut.

## **SULIAP SAQQUMMIUNNEQARNERA**

Ingerlatseqatigiiffik Rimbal Pty Ltd. Kalaallit Nunaata kitaani Nakkaalaap eqqaani sumiiffimmut kisermaassisussaataalluni aatsitassarsiorluni misissuinissamut, 2005-imi aatsitassarsiorluni misissuinissamut akuersissummik, akuersissut nr. 2005/17, akuerineqarpoq. Akuersissummi § 1-imi Kalaallit Nunaanni aatsitassarsiorluni misissuinissamut misissueqqaarnissamullu akuersissutinut atugassarititaasuni nalinginnaasuni, akuersissummut atuuttumi, imm. 101 innersuussutigineqarpoq. Atugassarititaasuni nalinginnaasuni imm. 101 imatut oqaasertaqarpoq:

*"101. Akuersissummi allamik allassimasoqanngippat, akuersissummi ilaatinneqarpoq aatsitassanik tamaginnik aatsitassarsiorluni misissuineq, ikummatissiassat, pinngoqqaatit qinngornernik ulorianartunik akullit aamma erngup nukinganik isumalluutit ilaanatik, takuuk aatsitassanut ikummatissanullu inatsimmi kapitali 3."*

Akuersissut 2005/17 tamatuma kingorna aatsitassarsiorluni misissuinissamut akuersissutinut nutaanut marlunmut, akuersissut nr. 2005/28 aamma 2005/29, aggulunneqarpoq. Aatsitassarsiorluni misissuinissamut akuersissut 2005/28 GM-imumut 2008-mi tunniunneqarpoq. 2010-mi apriliimi akuersissut taanna Naalakkersuisuni aalajangiineq malillugu akuersissummi nr. 2010/02-mi ukiunut 6-10-nut sivitsorneqarpoq. Akuersissut taamaalilluni Naalakkersuisut ulloq 21. april 2010 atsiorneranniit 31. december 2014 tikillugu atuuppoq. Akuersissummi nr. 2010/02-mi imm. 101 imatut oqaasertaqarpoq:

*"Akuersissummi aatsitassat atugassarititaasuni nalinginnaasuni immikkoortoq 101-imi allassimasut pineqartunut ilaatinneqarput, taassuma oqaasertaralugit; akuersissummi allamik allassimasoqanngippat, akuersissummi ilaatinneqarpoq aatsitassanik tamaginnik aatsitassarsiorluni misissuineq, ikummatissiassat, pinngoqqaatit qinngornernik ulorianartunik akullit aamma erngup nukinganik isumalluutit ilaanatik."*

Atugassarititaasuni nalinginnaasuni pinngoqqaatit qinngornernik ulorianartunik akullit ilaatinneqannginneranni, taamanikkut "akuersaanngilluinnarnissamik politikkeqarneq" atuuttoq atuutsinneqarpoq, tamatuma kingunerisaanik peqarfinit pinngortitami annertussutsit sinnerlugit pinngoqqaatinik qinngornernik ulorianartunik akulinnit, aatsitassarsiorluni misissuinissamut paaanissamullu akuersissummik tunniussisoqarsinnaanani. Akuersaanngilluinnarnissamik politikkeqarnerup atorunnaarsinneqarnissaa pillugu Inatsisartut aalajangiiffigisassaattut siunnersuutip siullermeerneqarneranut atatillugu Inatsisartunut saqqummiussissummi ulloq 8. oktober 2013, taamanikkut akuersaanngilluinnarnissamik politikkeqarneq imatut nassuiarneqarpoq:

*" Atortussiassanik aatsitassanik tamatumunngalu pingaaruteqartut sulianut suliassaqarfik Namminersorlutik Oqartussat 2009-mi tiguaat. 2009-mi Namminersornerup atuutilernerata kingornatigut suliassaqarfik taanna takussutissaavissortutut Namminersorlutik Oqartussat tigusaraat. Aatsitassaqarfiusumiipput aatsitassat suut tamarmik, aatsitassanimmi radiop qinngorneqanngitsunik paaanermut naleqqiullugu aatsitassat radiop qinngornillit paaarneqarnissaat inatsisitigut tunngasutigut tunngavigisami immikkoortitsivigineqanngillat.*

*Oqaluttuarisaanikkut tunngaveqartumik uranimik aatsitassanillu radiop qinngornilinnik allanik paaanissamut "attueqqusinnngilluinnarnerup" eqqunneqarnissaa pillugu politikikkut aalajangiisoqarpoq. Aatsitassarsiornissamut akuersissutini tamani ingerlatseqatigiiffiit aatsitassanik tamanik, taamaallaat aatsitassat radiop qinngornillit pinnagit, ujartuisinnaanerannik allassimasoqassasoq attueqqusinnngilluinnarnerup nassatarisimavaa."*

Aatsitassarsiorluni misissuineq maleruagassanut atugassarititaasunullu atuuttunut naapertuuttumik pisimasoq, ilanngullugu uranisiorluni misissuisoqarsimanngitsoq, uppersaqqullugu Aatsitassanut Ikummatissanullu Pisortaqaarfiup GM ulloq 6. juni 2008 qinnuigaa.

Ingerlatat tamarmik aatsitassanut ikummatissanullu inatsimmut aammalu aatsitassarsiorluni misissuinissamut akuersissummut tunniunneqartumut naapertuuttumik ingerlanneqarsimasut, allakkiami 8. juni 2008-meersumi GM-ip upernarsarpaa.

Atugassarititaasut nalinginnaasut, aatsitassarsiorluni misissuinissamut akuersissummut atuuttut – GM-ip sioqqutsisumik oqaloqatigineqareernerata kingorna – ulloq 9. september 2010 iluarsineqarput, tassani immikkoortut makkua ilanngunneqarlutik:

*"709. Tamakkiisumik imminut akilersinnaassutsimut misissuinernik, immikkoortoq 101-imi allassimasut killissaliussat iluanni avatangiisinut inuiaqatigiinnilu piujuartitsinissamut sunniutaasussanik nalilersuinernik ilaqartumik, suliaqarsinnaanissaq siunertaralugu, pegarfiup ingerlatsivigineqarsinnaaneranik misissuinerit atugassatut aatsitassanik nalinginnaasumik nunami qinngornerit sinnerlugit pinngoqqaatinik qinngornernik ulorianartunik akulinnik misissuinerit ilaatinneqassasut.*

[Aatsitassanut Ikummatissanullu Pisortaqarfiup] qinnuteqartoqarneratigut akuersissuteqarfigisinnaavaa. Misissuinerni nalunaarusianilu taakkunani piiaanermut teknikkinit, avatangiisinut aamma isumannaallisaanermut peqqinnissamullu tunngasortai, peqqarfinnut pinngoqqaatinik qinngornernik ulorianartunik akulinnut atassuteqartut, immikkut pingaartinneqassapput. Qinnuteqaat piffissami immikkoortoq 710-mi allassimasumi misissuinerit pilersaarutigineqartut nassuiarneqarnerannik imaqassaaq.

710. Misissuinerimik immikkoortoq 709-mi allassimasumik akuersissuteqarneq, akuersissuteqarnerup nalunaarutigineqarneraniit piffissamut ukiumik ataatsimik sivissusilimmut atuutissaaq. Immikkoortut 1001-1002 naapertorlugit nalunaarusiorneq misissuinerit immikkoortunut, immikkoortumut 709-mut naapertuuttumik ingerlanneqarsimasunut nassuiaammik imaqartoq [Aatsitassanut Ikummatissanullu Pisortaqarfiup] tigusimappagu aammalu allatigut akuersissummut atugassarititaasut atuuttut naammasineqarsimappata, piffissaq pisinnaatitsissummik pigisaqartup qinnuteqarneratigut piffissamut ukioq ataasikkaartumik sivitsorneqarsinnaavoq.

711. Immikkoortut 709-710 malillugit akuersissuteqarneq pinngoqqaatinik qinngornernik ulorianartunik akulinnik aatsitassarsiorluni misissuinissamut aamma piaanissamut akuersissummik tunineqarnissamut pisinnaatitaaffiliinngilaq.”  
(Matumani erseqqissarneqartoq)

Atugassarititaasut nalinginnaasut allanngortinneqarnerannut tunngaviusoq tassaavoq, GM-ip imminut akilersinnaassutsimut misissuinernik kiisalu peqarfimmut nalinginnaasumik nunami annertussutsit sinnerlugit aatsitassanik qinngornernik ulorianartunik akulimmut VVM-imut, VSB-imut aammalu peqqinnissamut misissuinernik suliaqarsinnaanissamik kissaateqarnera. Tamanna aamma GM oqaloqatigalugu atugassarititaasut nalinginnaasut allanngortinneqarnerannut tunngaviusoq.

Ulloq 18. oktober 2010 taamanikkut Inuussutissarsiornermut Aatsitassanullu Naalakkersuisuusup, Ove Karl Berthelsenip, urani pillugu § 36 naapertorlugu apeqquteqaat nr. 2010-201 ilaatigut imatut akissuteqarfigaa:

*”Kalaallit Nunaanni aatsitassanut tunngatillugu akuersissutit ingerlatsivigineqartut (misissueqqaarnerit, misissuinissamut akuersissutit, piaanissamut akuersissutit aamma annikitsumik aatsitassarsiorluni misissuinissamut akuersissutit ataatsimut katillugit) 2010-mi oktobarip aallaqqaataanni 113-iupput. Akuersissutinit taakkunanga 19-ini uranimik akoqarnerit pillugit paasissutissat nalunaarsorneqarput.*

*Aatsitassarsiorluni misissuinermik ingerlatsigaanni sumiiffinni immikkoortuni uranimik akoqarnerat qaffasinnerulersimasunik ilaqartunik naammattoorsisoqannginnissaa qulakkeerneqarsinnaanngilluinnarpoq. Taamatut pisoqartillugu peqarfik uranita ilanngunnagu piarneqarsinnaasoq paasinarsisinneqarsimappat, piaanissamut akuersissummik pissarsinissaa ajornartussaannngilaq.*

*Sumiiffinni allani teknologii maannakkut atornegartooq atornegartillugu, peqarfimmik uranita ilanngunnagu piaanissaa ajornartussaavoq, taamaattumik pisuni taamaattuni piaanissamut akuersissummik tunniussisoqarsinnaasussaannngilaq. Sumiiffimmut*

taamaattumut Kuannersuit assersuutissaalluarput.” (matumani erseqqissarneqartut)

§ 36 naapertorlugu apeqquteqaammut nr. 2010-201-imut akissuteqaammut ilanngunneqarpoq, tusagassiuutitigut nalunaarut 12. september 2010-meersoq Inuussutissarsiornermut Aatsitassanullu Naalakkersuisumit, Ove Karl Berthelsenimit, aatsitassarsiornermik suliaqartunut nassiussaa, qulequtaqartoq ”Uran-isiorkuinnanginnissamik politikki allannguuteqanngilaq”. Atugassarititaasut nalinginnaasuni imm. 709-711-imik allanngortitsinerit siuliani taaneqartut innersuussutigalugit tusagassiuutitigut nalunaarummi ilaatigut allassimavoq:

”Aatsitassanik misissuinissamik akuersissuteqarnermi tunngaviusumik piumasagaatit nutaanik ilassuteqarfigineqarneranni Naalakkersuisut kissaatigaat aatsitassanik radiop qinngornerinik akoqanngitsunik ujarlernermi pinngoqqaatinik radiop qinngornerinik akulinnik naammattuinermi apeqqutini sillimaniarnermut peqqissutsimullu tunngassuteqartuni paasisutissanik amerlanerusunik pissarsisinnaalernissat. Taamatut aalajangiussaqaarneq Naalakkersuisut pinngoqqaatinik radiop qinngornerinik akulinnik misissuinerit piiaanernillu kingunissaasinnaasunik paasisaqarusunnerunnerannut naapertuuppoq.

Taamatut malittarisassanik ilassuteqarnermi toqqaannangikkaluartumik erseqqissaavigineqarpoq assersuutigalugu avatangiisinut sunniutaasinnaasut nalilersorneqarnissaannut atatillugu misissuinissamik akuersissuteqarfigineqarnermi imaangitsoq tassa pinngoqqaatinik radiop qinngornerinik akulinnik misissuinissamik piiaanissamillu akuersissuteqartoqartassasoq.

Taamaattumik tassa Kalaallit Nunaanni urani pillugu politikki allannguuteqanngilaq, taamaalilluni pinngoqqaatinik radiop qinngornerinik akulinnik tunaartaqarluni misissuinerit piiaasinnaanerillu suli akuerineqanngilluinnarput.”

Ulloq 22. december 2011 GM aningaasanut niuerfimmumt nalunaarummik nassiussivoq, tassani ilaatigut makkua allassimallutik:

*“Greenland Minerals and Energy Limited-ip (GMEL; ASX: GGG) qanittumi nalunaarutigaa, GMEL-ip maannakkut aatsitassarsiorluni misissuinissamut akuersissut pigisaa EL 2010/02, Kuannersuarni suliassamut tunngassuteqartoq (GGG 61%), urani pineqartunut ilaaterlugu Naalakkersuisut allanngortissimagaat. Tamanna Kuannersuarni suliassap ingerlanneqarnissaanut ilusilersuinermit qanoq kinguneqassava? Aalajangiinerup taassuma suliassamut maannakkut piffissamut pilersaarummut sunniinissaa ilimanaateqarpa?*

[...]

*Tamanna Kuannersuarni suliassap oqaluttuarisaanerani siuariarneruvoq pingaaruteqartorujussuaq. Suliassami akuersissummut tunngavissarititaasuni maannakkut aamma urani ilaatinneqalerpoq, aammalu tamatuminnga piiaanissaq pillugu qinnuteqarnissamut inatsisitigut pisinnaatitaaffeqalerpugut. Taanna aatsitassarsiorluni misissuinissamut akuersissutini urani pineqartunut ilaaterlugu Kalaallit Nunaanni tunniunneqartuni taanna siullersaavoq, tamatumalu takutippaa suliassap ingerlanneqarnissaanut maannakkut ersarissumik politikkikkut tapersersuisoqalersoq. Maannakkut Naalakkersuisuniit, aatsitassanut suliassaqarfimmi nukittorsaanissamut pisussaaffeqalersunit, tapersersorneqarpugut, tamannalu suliassat pingaarnerit ilagaat.” (matumani erseqqissarneqarpoq)*

GM-imut aatsitassarsiorluni misissuinissamut akuersissummut nr. 2010/02-mut tapiliussaq 2012-imi upernaakkut Naalakkersuisunit aamma GM-imit atsiorneqarpoq aammalu ulloq 3. april 2012 atuutilerluni. Tapiliussami ilaatigut makkua allassimapput:

***”1. Saffiugassat akuersissummi pineqartunut ilaatinneqartut***

*101. Akuersissummi pineqartunut ilaatinneqarput aatsitassat atugassarititaasuni nalinginnaasuni immikkoortoq 101-imi allassimasut. Akuersissummi allamik allassimasoqanngippat, aatsitassat tamarmik pineqarput, ikummatissiassat, pinngoqqaatit*

qinngornernik ulorianartunik akullit aamma erngup nukinganik isumalluutit ilaanatik.

102. Aatsitassarsiorluni misissuinissamut akuersissummut tassunga piffissami akuersissuteqarfiusumi aamma akuersissummi ilaatinneqarput pinngoqqaatit qinngornernik ulorianartunik akullit, taamaattoq takukkit immikkoortut 201-202.

## **2. Pinngoqqaatinik qinngornernik ulorianartunik akulinnik pīaanissamut imaluunniit taakkununnga pīaanissamut pisinnaatitaaffeqannginneq**

201. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamut pisinnaatitaaffeqanngilaq aammalu pīaaqqussaanani. Pisinnaatitsissummik pigisaqartoq aamma pinngoqqaatinik qinngornernik ulorianartunik akulinnik pīaanissaq pillugu allanik pisinnaatitaaffeqanngilaq.

202. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik pisinnaatitaaffeqanngilaq. Pisinnaatitsissummik pigisaqartoq peqarfinnik pinngoqqaatinik qinngornernik ulorianartunik akulinnik niuerutigalugu pīarneqarsinnaasunik paasinarsisitsisimagaluarpat killissalersuisimagaluarpallu aammalu allatigut aatsitassarsiorluni misissuinissamut akuersissummi matumani atugassarititaasut naammassisimagaluarpagit, tamanna atuutissaq.

## **3. Pinngoqqaatinik qinngornernik ulorianartunik akulinnik pīaanissamut akuersissummik tunniussinissamik qinnuteqaat**

301. Pisinnaatitsissummik pigisaqartoq aatsitassarsiorluni misissuinissamut akuersissut manna tunngavigalugu pīaanissamut akuersissummik qinnuteqarpat, takuuk atugassarititaasuni nalinginnaasuni immikkoortoq 1401-1408, pisinnaatitsissummik pigisaqartoq aammattaaq pīaanissamut akuersissut malillugu pinngoqqaatinik qinngornernik ulorianartunik akulinnik pīaanissamik akuersissummik tunineqarnissamik qinnuteqarsinnaavoq.

302. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik qinnuteqarpat, takuuk immikkoortoq 301,



Naalakkersuisut killilersorneqanngitsumik allanillu  
tunnngaveqanngitsumik imaluunniit sunilluunniit  
tunnngaveqanngitsumik qinnuteqaat itigartissinnaavaat. Qinnuteqaat  
ilaatigut pinngoqqaatinik qinngornernik ulorianartunik akulinnik  
piiaanissamut akuersissummik tunniussinnginnissaq pillugu  
politikkikkut imaluunniit ingerlatsivimmi aalajangiineq  
tunnngavigalugu itigartinneqarsinnaavoq. Qinnuteqaatip  
itigartinneqarnera Kalaallit Nunaanni Namminersorlutik Oqartussat,  
Naalakkersuisut imaluunniit Aatsitassanut Ikummatissanullu  
Pisorta qarfik pisussaaffeqarnerinik malitseqassanngilaq  
akisussaatinneqassanatillu. ilanngullugu taarsiinissamut  
akisussaatisisoqassanani

303. Pisinnaatitsissummik pigisaqartoq pinngoqqaatinik  
qinngornernik ulorianartunik akulinnik piiaanissamut akuersissummik  
tunineqarnissamik qinnuteqaateqarpat, takuuk immikkoortoq 301,  
Naalakkersuisut killilersorneqanngitsumik aammalu sunilluunniit  
killeqanngitsumik pinngoqqaatinik qinngornernik ulorianartunik  
akulinnik piiaanissamut akuersissummik tunniussinermut  
atugassarititaasunik sunilluunniit aalajangersaasinnaapput.  
Naalakkersuisut ilaatigut piiaanermi ingerlatassat,  
isumannaallisaaneq, peqqinnissaq, avatangiisit, isumalluutunik  
atorluaaneq aamma inuiaqatigiinni piujuartussamik iluaqutaasumik  
sunniuteqartitsinissaq pillugit atugassarititaasunik kiisalu  
pinnaatitsissummik pigisaqartup Kalaallit Nunaanni  
Namminersorlutik Oqartussanut akiliutunik akiliinissaa pillugit  
atugassarititaasunik aalajangersaasinnaapput. [...]

304. Immikkoortut 201-202 malillugit allatut pisoqartussaasimappat,  
immikkoortut 301-303 atuutissanngillat. Immikkoortut 301-303,  
pinnaatitsissummik pigisaqartup pinngoqqaatinik qinngornernik  
ulorianartunik akulinnik piiaanissamut akuersissummik  
tunineqartussaataaneraniq malitseqanngillat.” (Matumani ataatsigut  
titarneqarpoq)

GM-imut akuersissut il.il. pillugu pissutsit arlallit erseqqissaqqullugit GM-ip Aatsitassanut Ikummatissanullu Pisorta qarfik ulloq 7. maj 2012 qinnuigaa, tassunga Aatsitassanut Ikummatissanullu Pisorta qarfik ulloq 1. juni 2012 ilaatigut akissuteqarluni, GM-imut aatsitassarsiorluni misissuinissamut akuersissut nr. 2010/02, akuersissummi pinngoqqaatit qinngornernik

ulorianartunik akullit pineqartunut ilaatilerlugit, 2012-imi januaarimi iluarsineqartoq. Aatsitassanut Ikummatissanullu Pisortaqarfiup tassunga atatillugu erseqqissarpaa iluarsissuteqarneq taaneqartoq GM-imut pinngoqqaatinik qinngornernik ulorianartunik akulinnik piiaanissamut pisinnaatitaaffiliinngitsoq, taamatullu siunissami piiaanissamut akuersissummik tunniussinissamut taanna pisinnaatitaaffiliinngitsoq.

Allakkiami 28. juni 2012-imeersumi NUNA Advokatit GM sinnerlugu Aatsitassanut Ikummatissanullu Pisortaqarfimmut saaffiginnippoq, tassami eqqartuussissuserisut suliffeqarfiat GM-ip suliassamut aningaasassarsinissamik ilungersuuteqarneranut atugassamik GM-imut 'legal opinion'-imik suliaqartussaagami. Eqqartuussissuserisut suliffeqarfiata GM-imut akuersissut pillugu apeqqutit arlallit Aatsitassanut Ikummatissanullu Pisortaqarfimmit akissuteqarfigeqquai. Akissuteqaammi 4. juli 2012-imeersumi Aatsitassanut Ikummatissanullu Pisortaqarfiup GM-imut akuersissutit il.il. erseqqinnerusumik nassuiarpai. Ilaatigut allanneqarpoq GM-imut aatsitassarsiorluni misissuinissamut akuersissummi peqatigisaanik GM pinngoqqaatinik qinngornernik ulorianartunik akulinnik piiaanissamut imaluunniit pinngoqqaatit qinngornernik ulorianartunik akullit pillugit piiaanissamut akuersissummik pisinnaatinneqanngitsoq.

Akuersaanngilluinnarnissamik politikkeqarnerup atorunnaarsinneqarsinnaanera pillugu apeqqut paasinarsinneqanngippat, piiaanissamut akuersissummik qinnuteqammik tunniussisoqassanngitsoq, GM-ip Aatsitassanut Ikummatissanullu Pisortaqarfimmut allakkiaani 19. oktober 2012-imeersumi GM allappoq. GM taamaalilluni tassunga atatillugu allappoq, ajornartorsiut paasinarsinneqaqqaartinnagu ingerlatseeqatigiiffimmi aktiaatillit suliassamut aningaasanik amerlanerusunik atuerusunngitsut. GM peqatigisaanik allappoq, suliassamut ukiuni 6-imi 450 mio. koruunit atorsimallugit, aammalu ingerlatassanut allanut aningaasalersuinissap pisinnaalernissaanut suliassap siunissaa paasinarsinneqaqqaartariaqartoq. GM taamatuttaaq allappoq qinnuteqaat piunasaqaatinut oqartussat suliassamut piunasaqaatigiumaagaannut naapertuutinngippat, piiaanissamut akuersissummik qinnuteqaateqartoqaralarpat Naalackersuisut aammalu Aatsitassanut Ikummatissanullu Pisortaqarfiup itigartitsinnaanerata, akuersaanngilluinnarnissamik politikkeqarnerup atorunnaarsinneqarnerata allanngortinngikkaa ilisimaaralugu.

Akuersaanngilluinnarnissamik politikkeqarnerup allanngortinneqarnissaa imaluunniit atorunnaarsinneqarnissaa Inatsisartuni arlaleriarluni oqalligisigineqartarpoq. Aatsitassanik piiaanermi uranip akuata 0,1%-imut qaffasinnerpaaffissalernerneqarnissaa sulissutigeqqullugu Naalakkersuisut peqquneqarnissaannut Inatsisartut aalajangiiffigisassaattut siunnersuutip ulloq 21. november 2012 aappassanneerreqarneranut atatillugu taamanikkut Inuussutissarsiornermut Aatsitassanullu Naalakkersuisuusoq GM-imut aatsitassarsiorluni misissuinissamut akuersissummut tapiliusseq 1 pillugu imatut oqaaseqarpoq:

*”Piffissap ingerlanerani urani pillugu apeqqutip annertunerusumik paasinarsisinneqarnissaanut tunngatillugu ingerlatanik arlalinnik aamma innuttaasunik ataatsimiititsinernik Naalakkersuisut ingerlataqarput.*

*Greenland Minerals and Energy Kuannersuarni peqarfimmi, aatsitassat uranitaqartut ilanngullugit, VVM-imut aamma VSB-imut misissuinernik suliaqarsinnaasoq akuersissuteqarpugut. Akuersissuteqarnermi tassani siunertaasoq tassaavoq, tunngaviusut pinerullugit politikkikkut oqallinnerit ingerlaannarnissaannut taarsiullugu, uranisiorluni aatsitassarsiorfimmik ingerlatsinermi sunniutaasussat pillugit ilisimasanik aalajangersimasunik pissarsinissaq. Misissuinerit taakkua suli naammassinngillat.”*

Akuersaanngilluinnarnissamik politikkeqarnerup atorunnaarsinneqarnissaa pillugu Inatsisartut aalajangiiffigisassaattut siunnersuutip suliarineqarnissaa sioqqullugu taamanikkut Inuussutissarsiornermut Aatsitassanullu Naalakkersuisuusoq, Jens-Erik Kirkegaard, ulloq 17. september 2013, akuersaanngilluinnarnissap atorunnaarsinneqarsinnaaneranut tunngatillugu apeqquteqaammut nr. 167-imut akissuteqarpoq. GM-imut akuersissut innersuussutigalugu taamanikkut Naalakkersuisuusoq ilaatigut imatut akissuteqarpoq:

*”Uranimik atuisinnaanermik akuersissummik nalunaarfigineqarnissaminut pisinnaatitaaffeqartumik pisinnaatitsisumik uranimik ujartuinissamik pisinnaatitaaffeqartut arlaannaalluunniit akuersissummik nalunaarfigineqarsimannngillat.*

*Aatsitassanut inatsit naapertorlugu Naalackersuisut  
aatsitassarsiornermut akuersissutinik arlalinnik  
nalunaaruteqarsimapput, ilanngullugit ilaatigut uranimik  
aatsitassanillu radioaktivinik qinngornertaqartunik allanik  
ujartuinissamut akuersissutit, akuersissutilli tamakku atuinissamut  
akuersissummik nalunaaruteqarfigineqarnissamut  
pisinnaatitaaffeqartumut pisinnaatitaaffimmik tunisinngillat  
akuutissanik radioaktiviusunik qinngornerit imarisaat  
pinngortitamit tunuliaqutaasumi annertussutsit  
qaangersimassappatigit.” (matumani erseqqissarneqartoq)*

Akuersaanngilluinnarnissamik politikkeqarnerup atorunnaarsinneqarnissaa pillugu Inatsisartut aalajangiiffigisassaattut siunnersuutip siuliani taaneqartup ulloq 8. oktober 2013 suliarineqarneranut atatillugu taamanikkut Inuusutissarsiornermut Aatsitassanullu Naalackersuisuusup, Jens-Erik Kirkegaardip, ulloq 16. oktober 2013 Aatsitassanut Ataatsimiititaliap apeqquai arlallit akissuteqarfigai. Tassani ilaatigut allassimavoq akuersaanngilluinnarnissamik politikkeqarnek, aatsitassarsiorluni misissuinermi aamma piaanermi ingerlatassanut aammalu taakkununga aatsitassat, nunami pinngortitamiittut sinnerlugit qinngornernik ulorianartunik akullit, ujaqqani granitiskiusuni urani 4-60 ppm-iniittutut allanneqarluni, pillugit akuersissutinut, atuuttoq.

Naalackersuisup tamatuma kingorna, tamatuma Kalaallit Nunaanni assersuutigalugu aatsitassanik qaqutigoortunik, ilaatigut Kalaallit Nunaata kujataata kitaaniittutut taaneqartunik, kisianni pinngoqqaatit qinngornernik ulorianartunik akoqarnerat nunami pinngortitamiittut sinnerlugit annertussuseqartuni, piaanissamut aqutissiuussisussaanera, akuersaanngilluinnarnissamik politikkeqarnerup atorunnaarsinneqarnissaa pillugu Naalackersuisut kissaateqarnerannut tunngavilersuutigaat. Akuersaanngilluinnarnissamik politikkeqarnerup atorunnaarsinneqarnissaa pillugu aalajangiiffigisassatut siunnersuut tamatuma kingorna Inatsisartuni akuerineqarpoq.

Ulloq 6. november 2014 Aatsitassanut Ikummatissanullu Aqutsisoqarfiup GM suliaassap piareersaataasumik tusarniaassutigineqarnissaanut atugassap, ”white book”-imik taagorneqartup, tunniunneqarnissaanut piffissamut pilersaarummik saqqummiusseqquaa. Ulloq taanna GM-ip pisortaa akissuteqarpoq,

ingerlatseqatigiiffik qinersisoqartussaanaera aammalu akuersaanngilluinnarnissamik politikkeqarnerup atuutsinneqaqqilersinnaanerata nalornissutigineqarnera pissutigalugu taamanikkut tunniussiniangitsoq.

2015-imi martsimi GM aatsitassarsiorluni misissuinissamut akuersissutip 2010/02-p sivitsorneqarnissaanik akuerineqarpoq. Sivitsuineq Naalakkersuisut atsiorneranniit (8. april 2015) 31. december 2017 tikillugu atuuppoq. Allakkiami allakkiat annertunerusut akuersissummut 2010/02-mut atuuttut innersuussutigineqarput, ilanngullugu tapiliussaq 1, GM pinngoqqaatinik qinngornernik ulorianartunik akulinnik piaanissamut akuersissummut pisinnaatitaaffeqanngitsoq pillugu atugassarititaasunik imaqartoq.

§ 37 naapertorlugu Inatsisartunut ilaasortap Múte B. Egedep (IA) apeqquteqaataanut nr. 2016-115-imut akissummi 13. maj 2016-imeersumi taamanikkut Aatsitassanut Naalakkersuisoq, Randi Vestergaard Evaldsen, akissuteqarpoq GM piaanissamut akuersissummut pisinnaatitaaffeqanngitsoq aammalu Namminersorlutik Oqartussanut taarsiinissamik piumasqaateqarsinnaanngitsoq pillugu GM-imut akuersissummut atugassarititaasut suli atuuttut. Naalakkersuisoq Randi Vestergaard Evaldsen tassunga atatillugu oqaaseqarpoq GM taarsiinissamik piumasqaateqarsinnaassanngitsoq Naalakkersuisut "assersuutigalugu pinngoqqaatit qinngornernik ulorianartunik akullit pillugit inmuttaasut taasitinneqarneri tunuliaqutaralugu pinngoqqaatinik qinngornernik ulorianartunik akulinnik iluaquteqarnissamut akuersissummik nalunaarfigineqarnissaq pillugu qinnuteqaammik itigartitsissagaluarpata".

Nutaarsiassani 2016-imi oktobarimeersuni, Minex-imi, ilaatigut Kuannersuarni suliassaq pillugu makkua allassimapput:

*"Suliassaq 2016-imi suliassaqarfinni arlalinnik annertuumik siuariaateqarpoq. GMEL-ip imaatigut angalanermut tunngasunik misissuinermit missingiut aammalu inuiaqatigiinni piujuaannartitsisumik ingerlatsinissamik nalilersuineq (VSB) naammassivai, taakkualu nutarterneqarnerat naammassingajalerpoq. Avatangiisinut sunniutaasussanik nalilersuinerup (VVM) ilai misissugassanngorlugit arlaannaannulluunniit attuumassuteqanngitsunut immikkut ilisimasaleqatigiinnut nassiunneqareerput, suliallu taassuma*

*ingerlanera naamassingajalerpoq. Tamatuma kingorna naatsorsuutigineqarpoq GMEL siunissami qanittumi tamakkiisumik piiaanissamut akuersissummik tunniussissasoq, taannalu tamatuma kingorna tamanut ammasumik tusarniaassutigineqartussaavoq. 2016-imi alloriarneq pingaaruteqartoq tassaasimavoq, Kalaallit Nunaanni aamma Danmarkimi 'best practice'-nut naapertuuttumik Kalaallit Nunaanni uranimik piiaanermut avammullu nioqquteqarnermut maleruagassiinissamut inatsisinik akuersinerat. Inatsisissamut siunnersuutit sisamat, uranimik piiaanermi avammullu nioqquteqarnermi Kunngaqarfik Danmarkip uranimik siaruarterinnginnissamik nunani tamalaani pisussaaffiinik naamassinninnissamik qulakkeerisussat, Inatsisartut akueraat. Tamanna alloriarneruvoq pingaaruteqartoq, GMEL naalackersuisut pineqartut qanimut oqaloqatigalugit uranimik pisinissaq pillugu isumaqatigiissuteqarnissamut (off-take agreement) suliaqarsinnaalersitsisoq."*

GM piiaanissamut akuersissummik qinnuteqaammik tunniussinissamut piareersimanersoq, 2016-imi novembarimi Inatsisartunut ilaasorta, Kalistat Lund, § 37 naapertorlugu apeqquteqaammi Aatsitassanut Naalackersuisumut apeqquteqarpoq. Naalackersuisup apeqquteqaat ulloq 30. november 2016 akissuteqarfigaa, tassani Kuannersuarni suliassamut killiffik erseqqinnerusumik allassimalluni. Tassunga atatillugu ilaatigut allassimavoq GM i august 2014-imi aggustimi suliassamut nassuiaammik, VVM-imut aamma VSB-imut nassuiaatinut missingiutinik siullernik, pisussaaffiusumik piareersaataasumik tusarniaassutigineqarlutik nassiuuneqarsimasunik, imaqartumik, nassiuussisimasoq. Naalackersuisut nittartagaanni takuneqarsinnaavoq piareersaataasumik tusarniaaneq ulloq 29. august 2014 aallartittumik ullup 6. oktober 2014-ip tungaanut ingerlanneqarsimasoq.

Ulloq 7. april 2017 Aatsitassanik Suliassa qarfinnut Avatangiisinut Aqutsisoqarfiup Avatangiisinut Aqutsisoqarfiup ("Avatangiisinut Aqutsisoqarfik") VVM-imut nassuiaammut missingiutip 2. december 2015-imeersup tamanut ammasumik tusarniaassutigalugu nassiuuneqarnissaanik GM itigartippaa, takuuk aatsitassanut ikummatissanullu inatsimmi kapitali 18 a. Avatangiisinut Aqutsisoqarfiup aalajangiinermi aammattaaq atugassarititaasut nalinginnaasuni imm. 1409 a aamma b, aatsitassarsiorluni misissuinerup

piiaanermut ikaarsaartinneqarnissaa pillugu atugassarititaasuni nalinginnaasuni § 14-ip ilaattut, innersuussutigai.

Aalajangiinermi ilaatigut allassimavoq, VVM-imut suliap ingerlaneranut siunertaasoq, aatsitassarsiorluni misissuinermit piiaanermi ingerlatassanut ikaarsaarnermi aarlerinaataasinnaasunik suussusersiinissaq, taamatullu iliuusissat aarlerinaataasut taakkua annikillisinniarlugit aallartinneqartussatut naatsorsuutigineqartut nassuiarneqartussaallutik. Aalajangiinermi erseqqissarneqarpoq avatangiisinut aarlerinaataasunik misissueqqissaarneq aammalu iliuusissanik annikillisitsisussanik toqqaaneq, ilaatigut nunani tamalaani 'best practice'-mut naapertuuttussaasut. Aalajangiinermi allassimavoq Avatangiisinut Aqutsisoqarfiup aalajangiinermi teknikkikkut siunnersortiminnit, Aarhus Universitet-imi Nationalt Center for Miljø og Energi (DCE) aamma Pinnngortitaleriffimmit (GINR) nalilersuinerit aammalu aalajangiinissanut missingiusiat pingaartissimagaat.

GM-imut aatsitassarsiorluni misissuinissamut akuersissutip nutaamik sivitsorneqarnera 2018-imi juunimi akuerineqarpoq. Sivitsuineq aatsitassarsiorluni misissuinissamut akuersissummut 2010/02-mut tapiliusaaq nr. 4-mi, Naalakkersuisut atsiornerranniit (31. juli 2018) 31. december 2020 tikillugu atuuttussami, akuerineqarpoq. Tapiliusaaq 4-mi allakkiat annertunerusut akuersissummut 2010/02-mut atuuttut, innersuussutigineqarput, ilanngullugu tapiliusaaq 1, matuma siuliani taaneqartutut, GM pinngoqqaatinik qinnngornernik ulorianartunik akulinnik piiaanissamut akuersissummut pisinnaatitaaffeqanngitsoq pillugu atugassarititaasunik imaqartoq.

Ulloq 17. juni 2019 GM aatsitassarsiorluni misissuinissamut akuersissut 2010/02 innersuussutigalugu suliasamut piiaanissamut akuersissummik qinnuteqarpoq. Assersuutigalugu VVM-imut nassuiaammut tekniskiunngitsumik eqikkaanermi allassimavoq, suliasami REE-nik (aatsitassat qaqutigootut saffiugassartai), uranimik, zinkinik aamma flusspat-inik piiaanissaq ilaatinneqartoq. Sumiiffimmi akuersissuteqarfiusumi uranimik akoqarnera pillugu VVM-imut nassuiaammut suliasamut takussutissiami allassimavoq, saffiugassaq uranimik 300 ppm missaanik akoqartoq. GM-ip qinnuteqaammut tapersiissutitut nalunaarutigaa ilaatigut aatsitassarsiorluni misissuinissamut akuersissummi peqarfik niuerutigineqartussanik piiaaffiusinnaasoq pineqartunut ilaatinneqartoq, aammalu GM-ip peqarfimmi piiaanissaq pilersaarutigaa. Qinnuteqaammi

allassimavoq, GM-ip VVM-imut kiisalu VSB-imut nassuiaat aammalu ”navigational safety investigation study” ilanngussimagai.

Ulloq 18. februar 2020 Avatangiisinut Aqutsisoqarfik GM-ip VVM-imut nassuiaammut missingusiaa juni 2019-imeersoq pillugu aalajangiivoq. Aalajangiinermi allassimavoq GM, VVM-imut nassuiaammut najoqqutassanik ilassutaasunik 2019-imi juulimi nassiussisimavoq. Aamma allassimavoq nassuiaat nassiuqqortoq GM-ip VVM-imut nassuiaasiaanut missingiutit sisamassarigaat. Aalajangiinermi Avatangiisinut Aqutsisoqarfik aalajangerpoq, VVM-imut nassuiaatip tamanut ammasumik tusarniaassutigalugu nassiuqqarsinnaanissaanut, missingiut allanngortinneqassasoq nutarterneqassasorlu.

GM-imut e-mailimi 21. april 2020-meersumi aatsitassanut oqartussat paasissutissiipput GM-ip aatsitassarsiorluni misissuinissamut akuersissutip nr. 2010/02-p ataani aatsitassanik nassaarsimanermut uppernarsaataasa nalilersorneqarnerat oqartussat maannakkut naammassisimagaat. E-mailimi ilatigut makkua allassimapput:

*“Aatsitassanut Naalackersuisoqarfiup (“Naalackersuisoqarfik”) aatsitassanik nassaarsimanermut uppernarsaatit, Greenland Minerals A/S-ip (“GM”) GM-imut kisermaassisussaatitaalluni aatsitassarsiorluni misissuinissamut akuersissut nr. 2010/02 naapertorlugu Naalackersuisoqarfimmut saqqummiussimasai, nalilersorlugit naammassivai.*

*Aatsitassanut ikummatissanullu inatsimmi § 29, imm. 2 naapertorlugu GM-imut aatsitassarsiorluni misissuinissamut akuersissummik tunniussinissamut piumasaqaatit pingaarnert ilagaat, GM-ip sumiiffimmi akuersissuteqarfiusumi aatsitassanik piiavigineqarsinnaasumik peqarfeqartoq uppernarsarsimassagaa (paasinarsisissimassagaa), tamannalu Naalackersuisunit akuerineqarsimassasoq.*

*Naalackersuisoqarfiup maannakkut akueraa, aatsitassat oxidit 16-it aammalu saffiugassaq ataaseq sumiiffimmi GM-imut kisermaassisussaatitaalluni aatsitassanik aatsitassarsiorluni*



*misissuinissamut akuersissummi nr. 2010/02-mi pineqartunut  
ilaasut, GM-ip uppersarsimagaa.*

*Oxiditut 16-inut aammalu saffiugassamut ataatsimut  
takussutissiaq Naalackersuisoqarfiup siunnersortaata Auralia  
Mining Consulting-ip allakkiaani ilanngunneqartumi  
immikkoortumi "Inerniliussineq nutartigaq - april 2020"  
qupperneq 7-imi takuneqarsinnaavoq.*

*Naalackersuisoqarfiup oxiditut 16-inut saffiugassamullu  
ataatsimut uppersarsaammut akuersissuteqarnissaanut,  
Naalackersuisut aatsitassanut ikummatissanullu inatsimmi §§ 16  
aamma 29 naapertorlugit GM-imut paaanissamut akuersissummik  
tunniussissappata tunniussippatalu tunniunneqartussamik,  
Naalackersuisut inaarutaasumik akuersissuteqarnissaat  
tunnigavissaatinneqarpoq."*

Aatsitassat nalunaarussiaq naapertorlugu peqarfimmut uppersarsarneqartut,  
suussutsinut pingasunut agguarneqarput; "light rare earth oxides" (LREO),  
"heavy rare earth oxides" (HREO) aamma "others", yttrium-inut, uranimut  
aamma zinkimut tunnigassuteqartut.

2020-mi aggustimi GM, VVM-imut nassuiaammut missingiummik nutaamik  
saqqummiussivoq. Oqartussat siunnersortai, DCE aamma GINR, ulloq 17.  
september 2020 naliliinermik tunniussivoq, tassani allassimalluni GM-ip VVM-  
imut nassuiaammut missingiutaa VVM-imut nassuiaatinut piumasaqaatit  
minnerpaaffissaannik naammassinnittoq, taamaalillunilu tamanut ammasumik  
tusarniaanissamut tunnigavissaliisoq. Peqatigisaanik naliliinermi allassimavoq  
VVM-imut nassuiaammi suli avatangiisinut nalornissutaasunik  
apeqqutissaqartoq il.il., paaanissamut akuersissummik qinnuteqarnermut  
atatillugu akuersissuteqarnissamut suliap ingerlanissaata  
aallartissinnaalernissaanut, sakkukillineqartariaqartunik imaluunniit  
aaqqiivigineqartariaqartunik. Naliliinermi imm. C1.1-imi paasineqarsinnaavoq  
nalornissutaasunut apeqqutit taaneqartut taakkua aammalu nalornissutaasut  
taamaalinerani, paaanissamut akuersissummik qinnuteqaateqarnissamut  
atatillugu akuersissuteqarnerup ingerlanneqarnissaanut  
tunnigavissaliisinaanissamut, sakkukillisinneqarsimanngitsut imaluunniit  
aaqqiivigineqarsimanngitsut. Kapitali 2 annertunerusunik misissuinissat pillugit

inassuteqaatinik immikkuullarissunik arlalinnik imaqarpoq, aammalu kapitali 3 paasinarsisitsinissanik inassutigineqartunik imaqarluni: R1-R22.

Oqartussat siunnersortai, DCE aamma GINR, Kuannersuarni suliassami avatangiisinut qulequttat qitiutinneqartut pillugit allakkiamik 9. oktober 2020-meersumik suliaqarput.

Ulloq 13. december 2020 VVM-imut nalunaarusiamut missingiut nutaaq naammassivoq. Ulloq 18. december 2020 Kuannersuarni suliassaq pillugu tusarniaanermut najoqqutassat Naalackersuisut tamanut saqqummiuppaat. Tassunga atatillugu VVM-imut nassuiaat, VSB-imut nassuiaat aammalu suliassamut najoqqutassat allat tamanut ammasumik tusarniaassutigalugit nassiunneqarput.

Nassuiaammi suliassamut nassuiaat naapertorlugu (immikkoortoq 3.4) saffiugassamik piianeq qaarsoq qaartiterlugu nunap qaavani piiavimmi ingerlanneqartussaavoq aammalu saffiugassaq sequtserneqartussaalluni. Tamatuma kingorna saffiugassaq **kimittusaavimmi** aammalu akuiaavimmi suliarineqartussaalluni.

Kimittusaavimmi tunisassiat tunineqarsinnaasut marluk tunisassiarineqartussaapput, zinki kimittusagaq aamma flusspat. Tunisassiap sinnikui igitassat tassaapput tailingsit imermik errortuinermi piiarneqartut (F-tailings), Avatangiisinut Aqutsisoqarfiup teknikkikkut siunnersortai naapertorlugit saffiugassap annertussuseqqaavisa 90 %-iisa missaannik annertussuseqartut, aammalu uranip saffiugassamiittup affaata missaannik akoqartut. Tailingsit 0,015 % missaannik uranip sinnikuinik akoqartussaapput.

Akuiaavimmi seernartunik assigiinngitsunik suussusilinnik imermik errortuinermit kimittusitinneqartut suliarineqartussaapput, taamaaliornermi aatsitassat qaqutigooortut saffiugassartai aamma uranoxidit (yellow cake) kimittusitit avissaartiterneqartussaallutik. Tassanngaaniit igitassat tassaapput chemical residue tailings (K-tailings). Avatangiisinut Aqutsisoqarfiup teknikkikkut siunnersortai naapertorlugit aatsitassat kimittusitit tunineqarsinnaasut saffiugassap piiarneqartup ataatsimut katillugu **annertussusaata** 1 %-iisa missaanniipput. Sinneruttut 99 %-it missai F-imaluunniit K-tailingsit inissiiivissamiitinneqartussaassapput, taakkua tamarnik Det Internationale Atomenergiagentur naapertorlugu igitassat annikitsumik

qinngornernik akulittut suussusilerneqarlutik. F- aamma K-tailingsit nassuiaat naapertorlugu F-tailingsinut aamma K-tailingsinut tasinngortaliani marlunni Tasermi inissinneqartussaapput. Aatsitassarsiorfiup piffissami ingerlanneqarfissaani F-tailingsit 100 mio. tonsit missaanniittut aammalu K-tailingsit 10 mio. tonsit missaanniittut inissinneqartussatut naatsorsuutigineqarput. Tatsip kuunnerani sapusiarujussuit marluk, tatsip imaanik tailingsinik akulimmik uninngatitsisussat, sananeqartussaapput.

Suliassaq saffiugassamik piiaanermut atatillugu aamma ujaqqanik atorneqartussaannngitsunik pilersitsiviusussaavoq. Aatsitassarsiorfiup piffissami ingerlanneqarfiani ujaqqat atorneqartussaannngitsut 100 mio. tonsit missaanniittut piltussaapput. Ujaqqat atorneqartussaannngitsut qaqqami qaleriiaarsuanngorlugit inissinneqartussaapput. Ujaqqat atorneqartussaannngitsut saffiugassatuulli pinngoqqaatinik, soorlu fluorinik, aatsitassat qaqutigoortut saffiugassartaannik aammalu qinngornernik ulorianartunik akulinnik, soorlu uranimik/thorium-imik, qaffasissunik akoqartussaapput.

VVM-imut nalunaarusiaq suliassap avatangiisinut sunniinissaanut naatsorsuutigineqartunut nassuiaammik, aammalu pinngortitap ataqatigiinneranut, silaannaap pitsaassusaanut, nunap qaavani imermut, nunap iluani imermut, issunut aammalu nunap qaavanut, nunami pinngortitamut aammalu isikkuata sunnerneqarnissaanut inuillu peqqissusaannut avatangiisinut aarlerinaataasunik nalilersuineramik, imaqarpoq. Nalilersuinermi 35-nik assigiinngitsunik sunniuteqartussat navianartorsiorderit assigiinngitsunik ilusillit 10-t nassuiarneqarput, taakkunanga 27-t pitsaaliuisunik iliuseqareernerit kingorna appassisumik aarlerinaateqalertussatut nalilerneqarlutik, aammalu 8-t akunnattumik annertussusilimmik aarlerinaateqalertussatut nalilerneqarlutik.

Matusereernerup kingorna erngup pitsaassusaa, erngup kuunna imaluunniit qinngornernik sunniineq pissutaallutik, tatsini naasunik uumasunillu annaasaqarnermik aammalu tatsini uumasut neriniartarfiinik sunniinermik, taamaaqataanillu imaani naasunik uumasunillu annaasaqarnermik aammalu imaani neriniartarfinnik sunniinermik kinguneqartumik, supernatant-inik aammalu akuutissanik manngertunik FTSF-iniit katataqarnissap aarlerinaateqarnera, akunnattumik annertussusilimmik aarlerinaateqartutut suussusilerneqartoq, ilimanaateqanngitsutut, kisianni annertuunik sunniuteqarsinnaasutut, isigineqarpoq.

Matusereernermi nunami naasunik uumasunillu, tatsini naasunik uumasunillu aammalu imaata naasuinik uomasuinillu annaasaqarnermik kinguneqartumik, FTSF-nut sapsiapi aserorsinnaanerata aarlerinaateqarnera, taamatuttaaq akunnattumik annertussusilimmik aarlerinaateqartut nalilerneqartoq, ilimanaateqanngitsut, kisianni annertuunik sunniuteqarsinnaasut, isigineqarpoq. Sapsiapi aserornera pissutigalugu, erngup pitsaassusaata sunnerneqarneranik aammalu inuunernik annaasaqarsinnaanermik kinguneqartumik taamatut navianaateqarnera, aamma akunnattumik annertussusilimmik aarlerinaateqartut nalilerneqartoq, ilimanaateqanngitsorujussuurtut, kisianni annertoorujussuarnik sunniuteqarsinnaasut, isigineqarpoq.

Matusereernerup kingorna nunami, imaani tatsini uumasunut timitaanni sunniinertut ittunik kinguneqartumik, tailingsit ataqatigiisumik kuunnerisa malitsigisaannik FTSF-ini aamma CSRF-ini sapsiapi aserornissaata aarlerinaateqarnera, taamatuttaaq akunnattumik annertussusilimmik aarlerinaateqartut nalilerneqartoq, ilimanaateqanngitsut, kisianni annertuunik sunniuteqarsinnaasut, isigineqarpoq.

Erngup pitsaassusaanik sunniisumik kinguneqartumik, siunertaanngitsumik tailingsit kinnerisa kuunnissaasa aarlerinaateqarnera, taamatuttaaq akunnattumik annertussusilimmik aarlerinaateqartut nalilerneqartoq, ilimanaateqanngitsut, kisianni annertuunik sunniuteqarsinnaasut, isigineqarpoq.

Avatangiisinut Aqutsisoqarfiup teknikkikkut siunnersortai, DCE aamma GINR, ulloq 26. januar 2021 allakkiamik saqqummiipput, suliassamut nassuiaammut kingullermut aamma VVM-imut nassuiaammut pingaarnertigut oqaaseqaatinik imaqartumik. Siunnersortit allakkiaanni, immikkoortoq 1-imi, ilaatigut allassimavoq naliliisoqartoq, VVM-imut nassuiaat VVM-imik suliaqarnermut malittarisassanut naapertuuttumik sularineqarsimasoq aammalu suliassamut nassuiaammut tunngatillugu eqqortunik takutitsisoq tamakkiisuusorlu. Tassunga tunngatillugu siunnersortit allapput, suliassap VVM-imut nassuiaammi nassuarneqartuniit annertunerusunik avatangiisinut sunniuteqartinnagu ingerlanneqarsinnaanera ilimanaateqartorujussusoq. Tamatumani naatsorsuutigineqarpoq suliassap pilersaarusiorneqarnerani ingerlanneqarneranilu 1) akuutissanik mingutsitsisartunik kuutsitsinissap annikinnerpaamiitinnissaa, 2) avatangiisit qanoq issusaasa

alapernaarsorneqarnissaa aamma 3) oqartussat naammattunik nakkutiginninnermut pisinnaasaqarnissaat, ukkatarineqassasut.

Siunnersortit allakkiami immikkoortoq 2-mi suliassami avatangiisinut tunngasuni immikkuullarissutut erseqqissarpaat, aatsitassarsiorfissap sanaartornermut ingerlatsinermullu immikkoortuini ujaqqat atorneqartussaangitsut 100 mio. tonsit missaannik annertussusillit, qaqqami inissiivinni inissinneqartussat aammalu aatsitassanik pinngoqqaatinillu assigiinngitsunik akoqartut, aammalu kuutsinneqarunik avatangiisinut sunniisinnaasussat, qaartiterlugit piiarneqartussaanerat. Inissiiviit anorimit silamillu sunnerneqartussaapput, piffissap ingerlanerani akui mingutsitsisartut avatangiisinut kuulertussaassallutik. Tamanna imermit pujoralanniillu mingutsitsinerup taassuma siaruarnissaata pitsaaliornissaanut immikkut eqqumaffigineqarnissaanik pisariaqartitsinermik malitseqartussaavoq.

Siunnersortit aammattaaq erseqqissarpaat, saffiugassaq zinkimik, fluorimik, uranimik aamma thorium-imik, avatangiisinut sunniisinnaasussanik, akoqartussaasoq. Piffissami ingerlatsinerup nalaani saffiugassaq 110 mio. tonsit missaannik annertussuseqartoq suliarineqartussaavoq, tamannalu pujoralatsitsisussaavoq, avatangiisinut eqqaaniittunut mingutsitsinermik siaruartitsisinnaasussamik. Pujoralannik mingutsitsinerup taassuma, teknologiinik pujoralannik annikillisitsisussanik atuinikkut, minnerpaamiitilerlugu annikillisinnissaata immikkut eqqumaffigineqarnissaa pisariaqartinneqartussaavoq.

Kiisalu siunnersortit erseqqissarpaat saffiugassap piiarneqartussap 98 %-ia igitassanngortussaasoq (tailings), Tasermi eqqaanilu inissiivinni inissinneqartussaallutik. Tailingsit pinngoqqaatinik qinngornernik akulinnik aamma qinngornernik akoqanngitsunik kimittusitat sinnikuinik kiisalu akuutissanik uumaatsunik akoqartussaapput, aammalu tailingsinik inissiivinniit mingutsitsinerup siaruarnissaata pitsaaliornissaata immikkut eqqumaffiginissaa pisariaqartinneqartussaavoq.

Siunnersortit allakkiami immikkoortoq 3-mi naliliipput, misissuinissat allakkiami 17. september 2020-meersumi inassutigineqartut (ilanngussaq 1-imi innersuussineq) suliassami sanaartornermut immikkoortup aallartissinnaalernissaanut suli ingerlanneqartussaasut. Tassani pineqarput annertunerusunik ornigulluni misissuinernik, nassuiaammi ilimagineqartunik

arlalinnik uppernarsaasussanik, ingerlatsisoqartariaqaraluartoq, aammalu sumiiffinni nunaminertamik atuiffigineqarnissaannik mianernartuni pinngoqqaatinik qinngornernik ulorianartunik akulinnik aamma qinngornernik ulorianartunik akoqanngitsunik katersuuffiusimasunik annertunerusunik misissuinerit ingerlanneqartariaqaraluartut. Aammattaaq teknikkikkut aaqqiissutissanut, taakkualu suliassamiit mingutsitsinermik annikillisisinermut atorineqarnissaannut, tapertaasumik uppernarsaatinik pissarsisoqartariaqaraluartoq. Allakkiamut ilanngussami allassimavoq suliaqartartuniit inassuteqaatit, R1-R22, naammattumik sumiissusersineqarsimasutut nalilerneqartut.

2021-mi januaarimi GM aatsitassarsiorluni misissuinissamut akuersissutip nr. 2010/02-p sivitsoqqinneqarnissaanik akuerineqarpoq. Taanna akuersissummut tapiliussaq nr. 7-mi akuerineqarpoq, Naalakkersuisut ulloq 1. februar 2021 atsiorneranniit 31. december 2022 tikillugu atuuttussaalluni.

Qinnuteqaat attatiinnarneqassappat, GM-ip piiaanissamut akuersissummik qinnuteqaataata itigartinneqarnissaa naatsorsuutigineqartariaqartoq, ulloq 15. december 2021 ataatsimiinnermi Naalakkersuisoqarfiup GM ilitsersorpaa, tassami GM-ip suliassamut nassuiaammi allammagu urani siunnerfigalugu aatsitassarsiorluni ingerlatassat suliariniarai.

Naalakkersuisoqarfiup GM tamanna pillugu ulloq 8. februar 2022 ataatsimiinnermi ilitsersoqqippaa.

GM-ip qinnuteqaatip maannatut iluseqartillugu attatiinnarnissaanut taarsiullugu piiaanissamut akuersissummik qinnuteqaatip tunuartinnissaanik aammalu nutaamik qinnuteqarnissamik periarfissaqartoq, pisuni marluusuni Naalakkersuisoqarfiup GM ilitsersorpaa. Naalakkersuisoqarfik tassunga atatillugu allappoq, qinnuteqaat nutaaq suliassamut nassuiaammik, uranimut inatsimmi aalajangersakkanik sillimaffiginnittumik, imaqartussaassasoq.

GM allakkiami 15. februar 2022-meersumi Naalakkersuisoqarfiup ataatsimiinnerni isummernerinut akerliuvoq, tassungalu atatillugu ilaatigut makkua allallugit:

*“Ataatsimiinnerni kalerriutigineqareersutut GM isumaqarpoq  
Naalakkersuisut isummersimanerat, Inatsisip aamma Piareersaalluni*

*suliarineqartut oqaasertaannut ersarissunut akerliusoq. Inatsit aamma Piareersaalluni suliarineqartut naapertorlugit, inatsisip i) akuersissutitut tunniunneqareersimasunut aamma ii) pisuni taassuma atorineqarnerata taarsiissutitalimmik arsaarinnissuteqarnerusussanut, atuunnissaa siunertarineqanngilaq. Ilinnut ulloq 8. februar 2022 ataatsimiinnermi Inatsisip nassuiarnera taanna saqqummiukkatsigu, avataaneersoq eqqartuussissuserisorsi, hr. Fruerlund, isumaqataavoq.*

*Nalungeriigartut GM-imut aatsitassarsiorluni misissuinissamut akuersissut (Aatsitassarsiorluni misissuinissamut akuersissut) Inatsisip atuutilernissaa ukiorpassuarnik sioqqullugu tunniunneqarpoq. Aatsitassarsiorluni misissuinissamut akuersissut Atugassarititaasut nalinginnaasuni imm. 14 naapertorlugu piiaanissamut akuersissummik tunineqarnissamut GM ersarissumik pisinnaatitaaffeqarneranik imaqarmat, pisinnaatitaanermik taassuminnga arsaarinninneq sunaluunniit Inatsimmi § 5, imm. 2 naapertorlugu akuersissummik atuutereersumik sunniinerusussaavoq, aammalu inatsisip atuuttut naapertorlugit taarsiissutitalimmik arsaarinninnerusussaalluni. Tamatuma malitsigisaanik Inatsisip atuutsinneqannginnissaanut piumasagaatit marluusut tamarmik, GM-imi pisumi, naammassineqareerput.*

[...]

*Kiisalu GM-ip torersuunissaq eqqarsaatigalugu uppernarsarpaa, Qinnuteqaatip tunuartinnissaanik kaammattuinerit akuerineqanngitsoq. GM-ip Qinnuteqaat attatiinnarpaa aammalu naatsorsuutigalugu Siunertanut nalunaarummut aamma Suleqatigiit pingasut isumaqatigiissutaannut (IBA) tunngatillugu suliap ingerlaneranut atatillugu naammassineqanngitsut peqqissaartumik siumut ingerlanissaannik Naalackersuisut isumaginnissasut naatsorsuutigalugu.”*

Piiaanissamut akuersissummik qinnuteqaat pillugu aalajangiisinnaanissamut suliami naammattunik paasissutissaqartoq, Naalackersuisut allakkani 5. maj 2022-meersuni GM-imut nalunaarutigaat. Taamaaqataanik tusagassiuutitigit nalunaarummi 6. maj 2022-meersumi tamat nalunaarfigineqarput.

Tusagassiuutitigut nalunaarummi 10. maj 2022-meersumi GM ilaatigut allappoq:

*“Ingerlatseqatigiiffiup Naalackersuisut nalunaarutaata (aamma tusagassiuutitigut nalunaarutip) sunniutissai nalilersuleruttorpai, ilanngullugu Ingerlatseqatigiiffiup Naalackersuisunut aamma danskit naalackersuisuinut isumaqatigiissitsiniarnermut suliakkiussaanut atatillugu. Ingerlatseqatigiiffik periaaseq nalunaaruteqarnermi aamma tusagassiuutitigut nalunaarummi allaaserineqartoq pisortatigoortumik akerlilersorlugu Naalackersuisunut allagaqassamaarpoq.”*

Aatsitassanut Inatsisillu Atuutsinneqarnerannut Naalackersuisoqarfimmut allakkani 3. juni 2022-meersumi paaanissamut akuersissummik qinnuteqaatip aalajangiiffiginissaanut paasissutissat naammattut pigineqartut ministereqarfiup nalunaaruteqarsimaneranut GM akerliliivoq. Aammattaaq GM Naalackersuisoqarfiup GM-ip paaanissamut akuersissummik qinnuteqaataanik suliarinninneranut arlalinnik allanik akerliliissuteqarluni allappoq.

GM allakkani 17. august aamma 19. august 2022-meersumi ilaatigut allappoq, paaanissamut akuersissummik qinnuteqaammik allaanerusumik tunniussinissamut imminut pisinnaatilluni. Ulloq 16. december 2022 GM-ip Kuannersuarni paaanissamut akuersissummik qinnuteqaammut 17. juni 2019-meersumut tapiliussaq pisortatigoortumik tunniuppa. Qinnuteqaammut tapiliussaq pillugu ilaatigut makkua allakkani 16. december 2022-meersumi allassimapput:

*“Akuersissummumut aaqqiissutissaq allatut iluseqartoq, allakkiap matuma imarisaa, aatsitassat qaqutigoortut (flusspat aamma zinki) kisimik piiarneqartussaallutik, aammalu uranimik piiasoqartussaananani, kisianni tamatumunnga taarsiullugu minguttutut peerneqartussaalluni aammalu tailingsinut inissiivissani (TSF) inissinneqartussaalluni, aaqqiissutissaavoq. Matuma siuliani nassuiarneqartutut uppersarsinnaavarput, akuersissummumut aaqqiissutissami allaanerusuni uranimik suliarinninnerup Kuannersuarni suliassami qinngornernik sunniinissaq annertuumik allangortittussaannigikkaa, uppersarsaatit (teknikkikkut siunnersortinut avataaneersunut suliaritinneqartut) takutikkaat.”*



2023-mi februaarimi GM aatsitassarsiorluni misissuinissamut akuersissutip 2010/02-p sivitsorneqarnissaanut akuerineqarpoq. Sivitsuineq Naalakkersuisut atsiorderaniit (10. februar 2023) 31. december 2025 tikillugu atuuppoq. Allakkiami allakkiat allat akuersissummut 2010/02-mut atuuttut, GM pinngoqqaatinik qinngornernik ulorianartunik akulinnik piiannissamut akuersissummut pisinnaatitaaffeqanngitsoq pillugu atugassarititaasunik imaqtut, innersuussutigineqarput, ilanngullugu tapiliussaq 1.

## TUSARNIAANERUP INGERLANERA

Allakkani 22. juli 2022-meersuni Kuannersuarni piiannissamut akuersissummik GM-ip qinnuteqaataa 17. juni 2019-meersoq pillugu aalajangiinissamut missingiut Aatsitassanut Inatsisillu Atuutsinneqarnerannut Naalakkersuisoqarfiup nassiuppaa. GM oqaaseqaatissaqarpat, taakkua ulloq 22. juli 2022 aallarnerfigalugu sapaatit akunnerisa sisamat iluanni tiguissaat Naalakkersuisut piumasaraat.

GM-ip tamatuma kingorna ulloq 17. august 2022, allakkiani paasissutissanilu Greenland Mineralsip piiannissamut akuersissummik qinnuteqaataata suliarineqarneranut tunngassuteqartuni tamaginni allagaatinik takunninnissaq Aatsitassanut Inatsisillu Atuutsinneqarnerannut Naalakkersuisoqarfimmut qinnutigaa. Ingerlatseqatigiiffiup piiannissamut akuersissummik qinnuteqaataata 17. juni 2019-meersup suliarineqarnerata, Aatsitassanut Inatsisillu Atuutsinneqarnerannut Naalakkersuisoqarfiup GM-ip allagaatinik takunninnissamik qinnuteqaataata naammassillugu suliarineqareernissaata tungaanut, kinguartinneqarnissaa, GM-ip tassunga atatillugu qinnutigaa.

Aatsitassanut Inatsisillu Atuutsinneqarnerannut Naalakkersuisoqarfiup aalajangiinermi 28. december 2022-meersumi ilaannakortumik GM-ip allagaatinik takunninnissamik qinnuteqaataa akueraa. Aalajangiineq suliami 2015 – 441 201244 MEL Greenland Minerals A/S Piiannissamut qinnuteqaat, kiisalu suliami 2022 – 5057 Greenland Minerals aalajangiineq il.il., allagaatinik takunninnissamut tunngassuteqarpoq. Suliami 2021 – Akuersaangilluinnarnissaq pillugu inatsit (matuma kingorna inatsimmut suliaasaq), allakkiani allagaatinik takunninnissaq akuerineqassanersoq, naliliinissamut piffissamik sivilunerusumik Naalakkersuisoqarfik

pisariaqartitsisoq, Naalackersuisoqarfiup peqatigisaanik aalajangiinermi oqaatigaa.

Kiisalu aalajangiinermi 28. december 2022-meersumi Naalackersuisoqarfiup, GM-ip piiaanissamut akuersissummik qinnuteqaataa 17. juni 2019-meersoq pillugu aalajangiinissamut missingiummut oqaaseqaatissaqaruni, GM ulloq 28. december 2022 aallarnerfigalugu sapaatit akunnerisa sisamat iluanni nassiusseqquaa.

Naalackersuisut piiaanissamut akuersissut pillugu aalajangiinissamut missingiusiaannut 22. juli 2022-meersumut oqaaseqaateqarnissaminut piffissamut killigititap kinguarteqqinneqarnissaa, Greenland Mineralsip allakkani 10. januar 2023-meersuni qinnutigaa.

Aalajangiinermi 16. januar 2023-meersumi GM-ip allagaatinik takunninnissamik qinnuiginninnera 17. august 2022-meersoq pillugu Aatsitassanut Inatsisillu Atuutsinneqarnerannut Naalackersuisoqarfik aalajangiivoq aammalu allagaatini inatsimmut suliassami pineqartunut ilaatinneqartuni arlalinni tamakkiisumik allagaatinik takunninnissaq akueralugu. Tassunga atatillugu Aatsitassanut Inatsisillu Atuutsinneqarnerannut Naalackersuisoqarfiup GM-ip kinguartitsinissamik qinnuiginninnera ilaannakortumik akueraa GM-ip oqaaseqaatissaqaruni saqqummiussinissaanut ulloq 10. februar 2023 tikillugu piffissamut killigititaq sivitsorlugu.

Tamatuma kingorna GM-ip qinnuteqaataa 17. juni 2019-meersoq pillugu aalajangiinissamut missingiummut oqaaseqaateqarnissamut piffissamut killigititap kinguarteqqinneqarnissaanik, GM allakkani 2023-mi 19. januaarimeersuni aamma 24. januaarimeersuni Aatsitassanut Inatsisillu Atuutsinneqarnerannut Naalackersuisoqarfik qinnuigaa.

Aalajangiinermi 3. februar 2023-meersumi Aatsitassanut Inatsisillu Atuutsinneqarnerannut Naalackersuisoqarfiup GM-ip allagaatinik takunninnissamik qinnuiginninnera 17. august 2022-meersoq naammassillugu suliaraa, peqatigisaanillu GM-imut oqaaseqaateqarnissamut piffissamut killigitinneqartoq ulloq 17. februar 2023 tikillugu sivitsorlugu.

Tamatuma kingorna GM-ip allakkani 10. februar 2023-meersuni Aatsitassanut Inatsisillu Atuutsinneqarnerannut aalajangiinissamut missingiummut 22. juli

2022-meersumut oqaaseqaateqarnissaminut piffissamut killigititap kinguarteqqinneqarnissaanik Naalackersuisoqarfik qinnuigaa. Naalackersuisoqarfiup allakkani 16. februar 2023-meersuni GM-imut oqaaseqaateqarnissamut piffissamut killigititap kinguarteqqinnissaa itigartippaa.

Allakkani 17. februar 2023-meersuni GM-ip aalajangiinissamut missingiummut 22. juli 2022-meersumut maannamuugallartoq oqaaseqaatissani tunniuppai.

Ulloq 29. marts 2023 aalajangiinissamut missingiummut 22. juli 2022-meersumut annertunerusunik oqaaseqaateqarnissamut kinguartitseqqittoqarnissaa GM-ip qinnutigaa.

## **INATSISITIGUT TUNNGAVISSAT**

### **Aatsitassanut ikummatissanullu inatsit**

#### ***Aatsitassarsiorluni misissuinissamut aamma pïiaanissamut akuersissutit***

Aatsitassanut ikummatissanullu inatsimmi § 16 malillugu, sumiiffimmut erseqqinnerusumik killissalersugaasumut, atugassarititaasut erseqqinnerusumik aalajangersarneqartut tunngavigalugit, aatsitassanut ataatsimut arlalinnulluunniit aatsitassarsiorluni misissuinissamut pïiaanissamullu kisermaassisussaatitaalluni akuersissummik Naalackersuisut tunniussisinnaapput. Aalajangersagaq malillugu aatsitassarsiorluni misissuinissamut aamma pïiaanissamut akuersissut immikkoortillugit tunniunneqarsinnaapput.

Aatsitassanut ikummatissanullu inatsimmi § 29, imm. 1 malillugu, piffissamut ukiut 10-t angullugit sivilissusilimmut imaluunniit pisuni immikkut ittuni ukiut 16-it tikillugit, § 16 malillugu aatsitassanut akuersissummik tunniussisoqartarnera, atuuppoq. Aalajangersakkami imm. 2-mi aalajangersarneqarpoq, pisinnaatitsissummik pigisaqartoq, imm. 1 malillugu akuersissutip ataani peqarfimmik taassuma pïiaaviginialersaagaanik paasinarsitsisimasoq killissalersuisimasorlu, aammalu akuersissummi atugassarititaasunik allatigut naammassinnittoq, taamatuttaaq pïiaanissamut akuersissummik tunineqarnissamut pisinnaatitaasoq.

***Avatangiisinik allanngutsaaliuineq, silap pissusaanik allanngutsaaliuineq aamma pinngortitamik illersuineq***

Aatsitassanut ikummatissanullu inatsimmi § 1-imi allassimavoq, ingerlatassat inatsimmi pineqartunut ilaatinneqartut isumannaallisaaneq, peqqinnissaq, avatangiisit, isumalluutinik atorluaaneq aammalu inuiaqatigiinni piujuaannartitsinissaq eqqarsaatigalugit isumannaatsumik ingerlanneqassasut.

Aatsitassanut ikummatissanullu inatsimmi kapitali 13 avatangiisinik allanngutsaaliuinissaq, silap pissusaanik allanngutsaaliuinissaq aammalu pinngortitamik illersuinissaq pillugit maleruagassanik imaqarpoq. § 51 malillugu avatangiisinik allanngutsaaliuinissaq pillugu maleruagassat pinngortitap avatangiisillu paarilluarnissaannut iluaqutaasussaapput, aammalu imm. 2 malillugu avatangiisinik allanngutsaaliuineranut maleruagassani ingerlatanik:

- 1) Inuit peqqissusaannik navianartorsiortitsisinnaasunit
- 2) Uumasunik imaluunniit naasunik imaluunniit nunami imaluunniit immami imaluunniit nunap iluani kulturikkut naleqartitanik ajoqusiisinnaasunit
- 3) Nunamik, imaanik, nunap iluanik imaluunniit pinngortitami isumalluutinik pisussaataalluni atuinermut akornusiisinnaasunit.
- 4) Sukisaarsaarnermut naleqartitanik imaluunniit ingerlatanik ajorseriartitsisinnaasunit.

pinngortitap avatangiisillu mingutsinneqarnissaannik allatigullu sunnerneqarnissaannik pitsaaliuinissaq, killilersimaarinissaq akiuinissarlu atuupput.

Aammattaq aalajangersakkami imm. 3-mi allassimavoq, matuma siuliani allassimasuni ilaatigut nunami, immami il.il. mingutsitsinissamik pitsaaliuinissaq, killilersimaarinissaq akiuiniarnissarlu pingaartumik siunertarineqartoq, taamatullu aatsitassanik allanillu isumalluutinik atuinissap maangaannartitsinissallu killilersimaarnissaa immikkut siunertarineqartoq.

Tassunga ilanngullugu § 52 malillugu avatangiisinik allanngutsaaliuineq pillugu inatsisip aqunneqarnerani, ilaatigut teknikki pissarsiarineqarsinnaasoq pitsaanerpaq atorlugu anguneqarsinnaasut pingaartinneqartussaapput. Aammalu § 53 malillugu, suliffeqarfiup mingutsitsinissap aarlerinaateqarnerata sapinngisamik annertunerpaamik killeqartilertussanngorlugu, suliaqarfigisassani toqqartussaavaa. Sumiiffiup qanoq issusaa mianerineqartussaavoq, ilanngullugu

maannakkut pīaanermi siunissamilu pīaanissamik pilersaaruteqarnermi, kiisalu imikoornernik, igitassanik allanillu akuutissanik atortussiassanillu mingutsitsisartunik **naapertuuttumik** eqqaanissamut periarfissaqarnerit.

§ 55 malillugu silap pissusaanik allanngutsaaliuineq pillugu maleruagassat, ingerlatanit mingutsitsisinnaanernik allatigullu silap pissusaanut tunngasunut sunniisinnaanernik, inuit peqqissusaannik navianartorsiortitsisinnaasunik imaluunniit uumasunik imaluunniit naasunik imaluunniit nunami imaluunniit immami imaluunniit nunap iluani imaluunniit taakkua iluanni pinngortitami imaluunniit kulturikkut naleqartitanik ajoqusiisinnaanernik pitsaaliuisussaapput, killilersimaarisussaapput akiuniartussaallutillu.

§ 59 malillugu pinngortitamik illersuineq pillugu maleruagassat pinngortitap avatangiisillu paarilluarnissaannut iluaqutaasussaapput. Inatsit malillugu aalajangiinerni, pinngortitamik kiisalu pinngortitami suussutsinik aammalu nunami namminermi nunanilu tamalaani pinngortitamik illersuiviusussatut toqqagaasuni uumasut najortagaannik ajorseriartitsinnginnissap aammalu uumasunik sumiiffiit toqqarneqarneranni pineqartunik akornusersuinnginnissap mianerineqarnissaat, Naalakkersuisut pingaartittussaavaat.

### ***VVM-imut aamma VSB-imut nassuiaatit***

Aatsitassanut ikummatissanullu inatsimmi § 73, imm. 1, nr. 2 malillugu, ingerlatassanik suliaqarnermi avatangiisinut sunniutaasussanik nalilersuineq suliarineqareerpat, tamatumunngalu nassuiaat (VVM-imut nassuiaat) Naalakkersuisunit akuerineqareerpat, aatsaat aatsitassanik pīaasoqarsinnaanera atuuppoq. Maleruagassat danskit europamiullu VVM-imut maleruagassiai aallaavigalugit ilusilersugaapput.

§ 74 malillugu qinnuteqartoq avatangiisinut sunniutaasussanik nalilersuisussaavoq, VVM-imut nassuiaammik suliaqartussaavoq, taannalu Naalakkersuisunut nassiuttussaallugu. ”Kalaallit Nunaanni aatsitassanik pīaanermut VVM-imut nassuiaammik (Avatangiisinut Sunniutaasussanik Nalilersuineq) suliaqarnermut malittarisassat”<sup>1</sup>, VVM-imut suliap ingerlanissaanut aammalu nassuiaammik suliaqarnissamut malittarisassanik erseqqinnerusunik aalajangersaaviusoq, innersuusutigineqarpoq.

---

<sup>1</sup> Aatsitassanut oqartussa, 2015.

Inatsimmi § 74, imm. 2 malillugu, najoqqutassat annertunerusut, avatangiisinut sunniutaasussanik nalilersuinermit (VVM) atugassat pissarsiarineqassat, imaluunniit VVM-imik suliaqarnissamik pissusaaffeqartoq annertunerusunik misissuissasoq imaluunniit pissutsinik avatangiisinut sunniutaasussanik nalilersuinermit pingaaruteqartunik, erseqqinnerusumik aalajangerneqartunik, nalilersuissasoq, Naalakkersuisut aalajangersinnaapput. § 75 malillugu VVM-imut nassuiaatip tunniunneqarnera tamanut Naalakkersuisut nalunaarutigisussaavaat.

Tamatuma saniatigut aatsitassanut ikummatissanullu inatsimmi § 76 malillugu atuuppoq, ingerlatassamut inuiaqatigiinnut tunngasunut annertuunik sunniuteqarsinnaasussatut ilimagineqartariaqartumut, aatsaat ingerlatassamik suliaqarnermi inuiaqatigiinni piujuartitsisumik ingerlatsinissamut nalilersuineq suliarineqareerpat, tamatumunngalu nassuiaat (VSB-imut nassuiaat) Naalakkersuisunit akuerineqareerpat, akuersissummik imaluunniit akuersissuteqarnermik pissarsisoqarsinnaasoq.

VSB-imut nassuiaatinut VVM-imut nassuiaatinut maleruagassat taamaaqatai atuupput, taakkua malillugit paasissutissanik annertunerusunik il.il. tunniussinissaq Naalakkersuisut piumasarisinnaavaat, taamatullu VSB-imut nassuiaammik tunniussinissaq pillugu paasissutissat tamanut nalunaarutigineqartussaallutik.

### **Uranimut inatsit**

Uranimik il. il., misissueqqaarnermut, ujaasinermit piiaanermullu inerteqquteqarneq pillugu Inatsisartut inatsisaat nr. 20, 1. december 2021-mersooq ("uranimut inatsit") 2021-mi ukiakkut ataatsimiinnermi akuerineqarpoq aammalu ulloq 1. december 2021 atuutilerana nalunaarutigineqarluni. Inatsisartut inatsisaat aatsitassanut ikummatissanullu inatsimmi aalajangersakkanut tapertaavoq, taamaalillunilu misissueqqaarnissamut, aatsitassarsiorluni misissuinissamut aamma piiaanissamut akuersissutinut aatsitassanut ikummatissanullu inatsit malillugu tunniunneqartunut atuulluni.

Uranimut inatsimmi § 1, imm. 1 malillugu uranimik misissueqqaarneq, uranisiorluni misissuineq aamma piiaaaneq akuerisaanngillat. Agguaqatigiissillugu isumalluummi tamarmiusumi uranimik akoqarnera 100 ppm inorlugu oqimaassuseqarpat, aatsaat misissueqqaarnissaq, aatsitassarsiorluni misissuinissaq aamma piiaanissaq uranip saniatigut aatsitassanut allanut

sammitinneqartoq akuerisaasoq, inatsimmi § 1, imm. 2-mi peqatigisaanik aalajangersarneqarpoq.

Uranip avatangiisinut siaruarsinnaanera aammalu uranip taamatut anianerata avatangiisinut ajornartorsiutaasumik sunniisinnaanera, uranimut inatsimmut tunngavigineqartoq, inatsisissatut siunnersuummi allassimavoq. Taamatuttaaq urani siunnerfigalugu aatsitassarsiorluni ingerlatassani, tunisassiornermut atatillugu aarlerinartorsiortitsisumik uranimik aniasoqarsinnaavoq, assersuutigalugu "yellow cake" kuutsittoorneraniit, assartuussinermut atatillugu, erngup suliarinninnermi atorneqartup kuutsittoornerani il.il. Urani siunnerfigalugu ingerlatassat inerteqqutigineqarneranni aarlerinaataasut taakkua arlallit aarlerinaataajunnaarsinneqartussaapput.

Uranimut inatsimmi § 1, imm. 2-mi naliusunut killissaliussanut aalajangersarneqartunut tunngaviusoq, taamaalilluni uranimut inatsimmi tunngavigineqartoq inatsisissatut siunnersuummi imatut tunngavilersorneqarpoq:

*"Oqimaassutsimik 100 ppm-imik (parts per millionimik) 0,01 pct.-imut assingusumik tunngaveqartitamik uranimut naleqassutsip killingisassaa aalajangerneqassasoq siunnersuutigineqarpoq. Naleqassutsip killigisaa taanna 2009-mi assingusumik uranisiornissamut inerteqqummik eqqussisoqarfiusumi Canadami Nova Scotiami atuuttumut assinguvoq.*

*Naleqassutsini killingisaa aamma uranimut pileqqaarfigisatut naleqassutsit qaqqap ujaraanit imaluunniit qaqqat ujaraannit aalajangerneqartarneranik tunngaveqartumik, taamaattumillu Kalaallit Nunaanni assut assigiinngiaartuusumik aalajangerneqarpoq. Qaqqat ujaraannut granitiskinut pileqqaarfigisatut naleqassuseq (tassa imaappoq pinngortitamiittartut annertussusaat) nalinginnaasumik 4-60 ppm-mik oqimaassuseqartarpoq. Taamaalilluni uranimut pileqqaarfigisatut naleqassuseq 100 ppm inorlugu oqimaassuseqartoq naliliisoqarpoq. 100 ppm-imik oqimaassuseqarnerani akuerisatut naleqassutsit killissaannik aalajangiinikkut siunnersuutip matuma uranimut pileqqaarfigisatut naleqassutsinik qaangiisuunatik imaqartunik suliniutit piviusunngortissinnaanerannut killilersuisuussannginnera qularnaarneqarpoq. Taamaaliornermi aamma suliassat*

*akuersaangilluinnarnissamik politikkeqarnerup siusinnerusukkut atuuttup nalaani piviusunngortinneqarsinnaasimasut piviusunngortinnissaanut periarfissat, siunnersuummi matumani killilerneqannginnissaat qulakkeerneqarpoq. Paarlattuanik naliliisoqarpoq 100 ppm-imik oqimaassusilinnut naliusunut killissaliineq inatsisip siunertaata qulakkeernissaanut naleqquttumik appasissuusooq.”*

Aammalu uranimut inatsimmi § 1, imm. 1-ip aamma 2-p ataqatigiinnerat pillugu ilaatigut aalajangersakkamut immikkoortunut nassuiaatini imatut allassimasoqarpoq:

*”Urani pinngorfimmigut qaqqat ujaraanni kinnernilu ujaranngortuni nassaassaavoq, taamaattumillu akuersissuteqarfittut sumiiffimmi, imaluunniit akuersissuteqarfittut sumiiffiusinnaasumi uranimik aalajangersimasumik annertussusilimmik tamatigut peqartoqartassaaq. Taamaattumik aatsitassarsiornermik suliniutinik piviusunngortitsinernik uranimik sutigulluunniit pīaanernut piviusumik attueqqusinnngilluinnarneq pinaveersitsissaaq, naak peqqinnissamat, pinngortitamut, avatangiisinut il.il. annertuumik qinngorneqartitaanngitsumik, imaluunniit kingunerisassalinnik sunniuteqarnissanut allanik aarleqqutitaqanngitsumik suliniutip piviusunngortissinnaaneranut . uranimik imaqassuseq ima annikitsigisutut naatsorsuutigineqarsinnaagaluarpat.*

*Taamaattumik imm. 1-imi inerteqquteqarnermut aaqqissuussineq, siunnersuummi imm. 2-mut ataqatigiissillugu atuarneqassaaq, taanna malillugu suliassat uranimit allaanerusunut siunnerfeqartinneqartut piviusunngortinneqarnissaat siunertaralugu naliusunut killiliussat inorlugit annertussusilimmik uranimik pīaanissaq pisariaqarpat aatsitassarsiorfissat inerteqquteqarnermut aaqqissuussinermi pineqartunut ilaatinneqaratik.”*

Aatsitassanut ikummatissanullu inatsimmi maleruagassanut tunngasut pillugit ilaatigut inatsisissatut siunnersuummi uranimut inatsimmut tunngavigineqartumi makkua allassimapput (takukkit nassuiaatit nalinginnaasut, imm.3.3):



*"Suliat siunnersuummi matumani ilaasut aamma aatsitassanut ikummatissanullu inatsimmi inatsisilersugaajuassapput. Taamaalilluni siunnersuut manna aatsitassanut ikummatissanullu inatsimmi aalajangersakkanik atuukkunnaartitsingilaq. Aamma taamaalilluni siunnersuummi matumani ilaasutut sulianut akuersissutinik pissarsinissaq aatsitassanut ikummatissanullu inatsimmik malittarinilluni pisinnaavoq. Taamatut tunngaveqartumik assersuutigalugu aatsitassanut ikummatissanullu inatsimmi aalajangersakkat malillugit akuersissut pillugu qinnuteqaatip itigartitsissutiginera nalunaarutigineqarsinnaavoq, naak siunnersuummut matumunnga suliniut aalajangersimasoq akerliusuunngikkaluartooq.*

*Siunnersuut piviusutut pisuni aatsitassanut ikummatissanullu inatsisaata aallaavigisaanik sanioqqutsisinnaavoq. Ujaasinissamut akuersissuummut pisinnaatitsissummik piginnittup aatsitassanik piigassanik takussutissiillunilu killiliisimasoq, aammalu akuersissuummi atugassarisanik naapertuutsisimasoq piiaanissamut akuersissutip nalunaarutigitinnissamut pisussaaffeqartuusooq aatsitassanut ikummatissanullu inatsimmi § 29, imm. 2 atuutsitsivoq. Uranimik ilaqartumut ujaasinissamut akuersissummik pisinnaatitsissummik piginnittoq siunnersuutip matuma atuutsitaalernerata kingornatigut uranimut piiaanissamut akuersissummik nalunaarutigitinnissaminut pisinnaatitaaffeqanngilaq, pisinnaatitsissummik piginnittoq uraneqarfimmik takussutissiillunilu killiliisimagaluarpalluunniit. Taamatuttaaq atuuppoq aatsitassanik takussutissiissutit sinnerinut, § 1-imi inerteqqummut akerliujunnartussanut piiaanissamut akuersissummik nalunaaruteqartarnej. Aammattaaq siunnersuummi § 2 malillugu Naalackersuisut aalajangersakkanik aalajangiiffigisimasinnaasaannut pinngoqqaatinut radioaktivusunut pigisanut tamanna taamatuttaaq atuuppoq."*

Uranimut inatsit § 1, imm. 1-imi inerteqquteqarnerup saneqqunneqarnissaanik akuersissuteqarsinnaanermut inatsimmi tunngavissamik imaqanngilaq. Kisiannili uranimut inatsit taarsiissutitalimmik arsaarinnittarnermut inatsisaanngimmat, taamaattumillu pigisanut pisinnaatitaaffinnik illersugaasunik taarsiissutitalimmik arsaarinnissuteqarnissamut inatsimmi tunngavissaliinani, inerteqquteqarnej

taarsiissutitalimmik arsaarinninnertut akuliunnertut isigineqartariaqartillugu, uranimut inatsimmi § 1, imm. 1-imi aamma 2-mi inerteqquteqarneq atuuttussaangilaq, takuuk inatsisissatut siunnersuummi 17. septembari 2021-meersumi imm. 3.3.

Aalajangersakkami inerteqquteqarnermut aaqqissuussinermi, piareersaalluni suliaqarnerit malillugit, aammattaaq annikitsumik aatsitassarsiorluni suliaassat aamma akuersissummik peqarani aatsitassanik katersineq pīaanerlu pineqartunut ilaatinneqanngillat, takukkit aatsitassanut ikummatissanullu inatsimmi kapitalit 8 aamma 11. Aatsitassat qinngornernik ulorianartunik akullit, ilanngullugit urani, aatsitassanut ikummatissanullu inatsimmi ingerlatassanut taakkununga ilaatinneqanngereerput. Kiisalu aalajangersakkami inerteqquteqarnermut aaqqissuussineq, ilisimatuussutsikkut misissuineranut aatsitassanut ikummatissanullu inatsimmi § 2, imm. 3-mi aamma 4-mi, kiisalu kapitali 12-imi pineqartunut, ilaatinneqanngilaq.

Uranimut inatsit taassuma atuutilernerata nalunaarutigineqarnerata aqaguani atuutilerpoq, takuuk § 5, imm. 1, tassa imaappoq ulloq 2. december 2021. Tamatuma kingorna inatsit akuersissutinut tamaginnut inatsisip atuutilernerata *kingorna* tunniunneqartunut atuuppoq, takuuk inatsimmi § 5, imm. 2.

§ 5-imut nassuiaatit malillugit, pīaanissamat akuersissut aatsitassarsiorluni misissuinissamat akuersissummut ”nangissutigalugu” tunniunneqaraluartoq, aammalu aatsitassarsiorluni misissuinissamat akuersissut inatsisip atuutilinnginnerani tunniunneqaraluartoq, tamanna atuuppoq. Aatsitassarsiorluni misissuinissamat akuersissutit aamma pīaanissamat akuersissutit taamaalillutik immikkut akuersissutit uranimut inatsimmi isigineqarput, tamannalu aatsitassanut ikummatissanullu inatsimmi tunngaviusumut naapertuuppoq, takuuk tassani § 16, imm. 1, oqaaseqatigiit aappaat.

### **Tunngaviusumik inatsit**

Tunngaviusumik inatsimmi § 73, imm. 1 malillugu, inuiaqatigiinni tamat tamanna piumasarisimanngippassuk, kinaluunniit pigisaminik piginnikkunnaarnissamik pisussaaffilerneqarsinnaangilaq. Aammattaaq tamanna taamaallaat inatsisitigut aammalu tamakkiisumik taarsiiffigineqartumik pisinnaavoq.

Pissutsit § 73-imi pineqartunut ilaasutut isigineqarnissaannut piumasqaataavoq, aalajangersakkami pineqartunik pigisanik piginnikkunnaarnissaq pineqassasoq. Piginnittuunermut oqaatsimi pigisat aalaakkaasut saniatigut ilaatinneqarput pigisat nuunneqarsinnaasut, pisassaqtutut pisinnaatitaaffiit il.il., ilaatigut inuussutissarsiornissamut pisinnatitaanerit aammalu inatsit naapertorlugu akuersissutit, takuuk assersuutigalugu U 1981.394 H (Immunnut ingerlatsinissamut akuersissummi eqqartuussineq), tassani Højesteret-ip tunngavigaa immuliorfiit sumiiffimmi aalajangersimasumi immunnik kisermaassillutik tuniniaanissamut akuersissutit pigisaat illersugaasumik pisinnaatitaaffiusut § 73-mi pineqartunut ilaatinneqartut.

Maleruagassiineq aalajangersimasoq piginnittussaataitanerimi illersugaasumi akuliunnerunersoq naliliinermi, maleruagassiineq pisinnaatitaaffinni pioreersuni akuliunnerunersoq, imaluunniit maleruagassiineq taamaallaat pisinnaatitaaneq pillugu tigussaanginnerusuni imaluunniit ilisimanagu naatsorsuutiginninnermi akuliunnerunersoq, annertuumik apeqqutaavoq.

Pisinnaatitaaffeqarnek tigussaangitsoq imaluunniit ilisimanagu naatsorsuutiginninnerq taamaallaat inatsisit malillugit akuersissummik qinnuteqarnissamut periarfissaasinnaavoq, suli atorneqarsimanngitsoq imaluunniit oqartussanut oqaatigineqarsimanngitsoq. Aallaaviatigut pisinnaatitaaffeqarluni tigussaangitsumik imaluunniit ilisimanagu naatsorsuutigisaqarnek tunngaviusumik inatsimmi § 73-imi illersugaasussaangilaq.

Taamaattoq pisinnaatitaaffeqarnermi tunngaviusumik inatsimmi § 73 malillugu illersorneqartumi akuliuttoqartoq tassani pineqarpat, tamanna isumaqanngilaq taarsiissutitalimmik arsaarinnittoqartoq. Tamatuma saniatigut akuliunneq aalajangersakkami pineqartuni piginnikkunnaarnertut iluseqassasoq pisariaqarpoq. Piginnittussaataitanerimi aalajangersimasumik akuliunneq piginnikkunnaarnerunersoq, ataatsimoortumik naliliinissaq apeqqutaavoq. Tamatumunnga naalagaaffinnut inatsisitigut atuagassiat erseqqinnerusumik innersuussutigineqarput, ilaatigut takuuk Jens Peter Christensen allallu, Dansk Statsret, 3. udgave, 2020, qupperneq 349 ff.

## TUNNGAVILERSUUT

### **Piiaanissamut akuersissummik qinnuteqaat uranimut inatsimmi pineqartunut ilaatinneqarpoq**

Uranimut inatsimmi § 1, imm. 1 malillugu ingerlatassaq uranip saniatigut aatsitassanut allanut sammitinneqarsimangippat, aammalu isumalluummi tamarmiusumi uranimik akoqarnera oqimaassusaa aallaavigalugu agguaqatigiissillugu 100 ppm inorlugu annertussuseqarsimangippat, uranimik misissueqqaarnissaq, aatsitassarsiorluni misissuinissaq aamma piiaanissaq akuerisaanngillat, takuuk aalajangersakkami imm. 2.

Inatsisissatut siunnersuummi uranimut inatsimmut tunngavigineqartumi allassimavoq, inerteqquteqarnerup atuutsinneqalernerani uranimik avatangiisinut eqqaaniittunut siaruartitsinissap aarlerinaateqarunnaarsinneqarnissaa kissaatigineqartoq. Taamaattoq isumalluut uranimik annikitsuaraaqqamik taamaallaat akoqarpat, tassa imaappoq uranimut killissaliusaaq 100 ppm-inik (parts per million) oqimaassuseqartoq aallaavigalugu, 0,01 procentinut naapertuulluni, aatsitassarsiorluni ingerlatassat uraninit allaanerusunut sammitinneqartut, akuerisaapput. Inatsisiliortut naliliipput oqimaassuseq 100 ppm killigitinneqarpat, inatsimmi siunertap qulakkeernissaanut tamanna naammattumik appasisuseqartoq, peqatigisaanillu suliassat uranimik akoqarnera pinngortitami nunami annertussutsinit annertunerunngippat, suli piviusunngortinneqarsinnaallutik.

Uranimut inatsimmi uranimik piiaanissap inerteqqutigineqarneranut taamaalilluni, aatsitassarsiorfimmik ingerlatsinermut atasumik, uranimik aniatitsisoqarsinnaanerata aarlerinaataarutsinnissaa pillugu aalajangiineq tunngavilersuutigineqarpoq. aarlerinaataasut annikillisinnissaat kisiat pinnagu, kisianni aamma uranimik piiaanermut atasumik aarlerinaataarutsitsinissaaq pillugu tunngaviusoq aallaavigalugu uranimik piiaanissap inerteqqutigineqarnerata akuerinissaa, aatsitassanut suliassaqarfimmi inatsisiliortutut Inatsisartut piginnaatitaaneranniippoq.

Uranimut inatsit taassuma atuutilernerata nalunaarutigineqarnerata aqaguani atuutilerpoq, takuuk § 5, imm. 1, tassa imaappoq ulloq 2. december 2021. Tamatuma kingorna inatsit akuersissutinut tamaginnut, inatsisip atuutilernerata kingorna tunniunneqartunut atuuppoq, takuuk inatsimmi § 5, imm. 2.

Aatsitassarsiorluni misissuinissamut akuersissummut nangissutigalugu pīaanissamut akuersissut, aamma aatsitassarsiorluni misissuinissamut akuersissut inatsisip atuutilernissaa sioqqullugu tunniunneqarsimagaluartut, § 5-imut nassuiaatit malillugit tamanna atuuppoq. Aatsitassarsiorluni misissuinissamut akuersissutit aamma pīaanissamut akuersissutit uranimut inatsimmi immikkut akuersissutit taamaalillutik isigineqarput, tamannalu aatsitassanut ikummatissanullu inatsimmi tungaviusumut **naapertuuppoq**, takuuk tassani § 16, imm. 1, oqaaseqatigiit aappaat.

Kuannersuarni suliassamut pīaanissamut akuersissummik qinnuteqaat ulloq 17. juni 2019-imeersumi suliassaq, suliassamut aatsitassarsiorluni misissuinissamut akuersissummi nr. 2010/02-mi nassuiarneqartumut assingusoq, aallaavigineqarpoq. Aatsitassarsiorluni misissuinissamut akuersissut sumiiffimmut akuersissuteqarfiusumut Kommune Kujallermi illoqarfiup Narsap eqqaani inissisimasumut, aammalu katillugu 80 km<sup>2</sup>-inik angissusilimmut, nunap assingani naleqqat teqequinit erseqqinnerusumik killissalersugaasumut, tunggassuteqarpoq, takuuk aatsitassarsiorluni misissuinissamut akuersissut 2010/02-mi imm. 201.

Qinnuteqaammut 17. juni 2019-imeersumut VVM-imut nassuiaammi suliassamut nassuiaatini allassimavoq, aatsitassat qaqutigoortut saffugassartaannik (REE-nut tunisassiat) pīaanissaq pilersaarutigineqartoq, taamatullu suliassami saniatigut tunisassiatut urani, zinkit aamma flusspat tunisassiarineqarniartut. Sumiiffimmi akuersissuteqarfiusumi uranimik akoqartut pillugit VVM-imut nassuiaammi suliassamut takussutissiami allassimavoq saffugassaq 300 ppm missaannik uranimik akoqartoq. Saniatigut tunisassiarineqartussat pillugit allassimavoq, *"urani, zinkit kimittusitit aamma flusspat annikitsut, kisianni niuerutiginissaannut nalituutut annertussusillit"* tunisassiarineqartussaasut. Aammattaaq VVM-imut nassuiaammi allassimavoq ukiumut uranoxidit agguaqatigiissillugu 500 tonsit missai tunisassiarineqartussaasut, ammalu suliassami uranoxidit tunisassiarineqartut atomip nukinganic innaallagissiorfinni ikummatissatut atugassatut innaallagissiorfinnut tunineqartartussaasut.

Tamanna naapertorlugu uranimut inatsimmi § 1, imm. 1-imi nassuiarneqartutut, suliassami uranimik pīaasoqartussaavoq. Tamatuma saniatigut isumalluutip tamarmiusup agguaqatigiissillugu uranimik akoqarnera, oqimaassutsit

aallaavigalugit 300 ppm-inut nalilerneqarpoq. Uranimut inatsimmi pineqartuni ingerlatassat uranimit allaanerusunut aatsitassanut sammitinneqaraluarpalluunniit, piiaanissaq uranimut inatsimmi § 1, imm. 2-mi killissaliussanit annikinnerunngilaq.

Kuannersuarni suliassamut piiaanissamut akuersissummik qinnuteqaat 17. juni 2019-imeersoq taamaalilluni § 1, imm. 1-imi uranimik misissueqqaarnissap, aatsitassarsiorluni misissuinissap piiaanissallu uranimut inatsimmi inerteqquteqarnermi pineqartunut ilaatinneqarpoq. Tassani atuuppoq, Kuannersuarni suliassamut aatsitassarsiorluni misissuinissamut akuersissut 2010/02 uranimut inatsisip atuutilinnginnerani tunniunneqarsimagaluarpalluunniit. Uranimut inatsit, inatsimmi § 1-imi inerteqquteqarnerup saneqqunneqarnissaanut akuersinissamut periarfissamik imaqanngilaq.

### **Piiaanissamut akuersissutip itigartinneqarnera taarsiissutitalimmik arsaarinninnerunngilaq**

Uranimut inatsimmut piareersaalluni suliani allassimavoq inatsit taarsiissutitalimmik arsaarinnissuteqarnermut inatsisitut iluseqanngitsoq, taamaattumillu piginnittussaataanerit illersugaasut taarsiissutitalimmik arsaarinnissutiginnissaannut inatsimmi tungavissaliinngitsoq. Tamanna tungavigalugu allassimavoq, ataasiakkaatigut naliliinermi tungaviusumik inatsimmi § 73-imi pigisat illersugaasut taarsiissutitalimmik arsaarinnissutitut akuliuffigineqartut naliliisoqarpat, taamaalilluni akuersissummik tunniussinissamut itigartitsisoqarsinnaanngitsoq imaluunniit akuersissut uterteqquneqarsinnaanngitsoq.

Kisianni piiaanissamut akuersissummik qinnuteqaatip itigartinneqarnera tungaviusumik inatsimmi § 73, imm. 1 malillugu piginnittussaataanermi illersugaasumi akuliunnermut takussutissaanngilaq. Tamatumunnga pissutaavoq, pisinnaatitaanerit pioreersut akuliuffigineqarnerat tassani pineqanngimmat. Aammattaaq qinnuteqaatip 17. juni 2019-imeersup akuerineqarnissaanik naatsorsuutigisaqarneq pissutissaqanngilaq.

Tamatumani oqaatigineqarpoq, aatsitassarsiorluni misissuinissamut akuersissummut tapiliussami nr. 1-imi imm. 201-202-mi aalajangerneqartoq, akuersissutip pinngoqqaatit qinngornernik ulorianartunik akullit ilaatilerlugit

annertusitinneqarnerani, peqatigisaanik pinngoqqaatinik qinngornernik ulorianartunik akulinnik pīaanissamut akuersissummut GM pisinnaatitaaffilerneqanngitsoq. Tamanna tapiliussami imm. 304-mi uteqqinneqarpoq. Peqatigisaanik tapiliussami imm. 302-mi aalajangersarneqarpoq Naalakkersuisut pinngoqqaatinik qinngornernik ulorianartunik akulinnik pīaanissamut akuersissummik qinnuteqaammut nammineerlutik aammalu tunngavilersuutitaqanngitsumik itigartitsisinnaasut.

Taamaaliornermi tapiliussami erseqqissumik aalajangersarneqarpoq, pinngoqqaatinik qinngornernik ulorianartunik akulinnik aatsitassarsiorluni misissuinissamut akuersissummik tunniussisoqarnera, pinngoqqaatinik qinngornernik ulorianartunik akulinnik pīaanissamut akuersissummik tunniussinissamut pisinnaatitaaffiliinngitsoq. GM taamaalilluni aatsitassarsiorluni misissuinissamut akuersissummut tapiliussap atuunnerani, tunngaviusumik inatsimmi § 73 malillugu illersugaasumik piginnittussaataaffilerneqanngilaq.

Tamatuma kingorna suliap ingerlanera aammattaaq pinngoqqaatinik qinngornernik ulorianartunik akulinnik pīaanissamut akuersissummik tunineqarnissaq pillugu pisinnaatitaanermik naatsorsuutigisaqarnissamut tunngavissaliinngilaq.

Matumuuna immikkut oqaatigineqassaaq, aatsitassarsiorluni misissuinissamut akuersissummut tapiliussaq pinngoqqaatinik qinngornernik ulorianartunik akulinnik pīaanissamut pisinnaatitaanermik kinguneqanngitsoq, taamatullu tapiliussaq pinngoqqaatinik qinngornernik ulorianartunik akulinnik pīaanissamut akuersissummik tunineqarnissamut pisinnaatitaaffiliinngitsoq, Aatsitassanut Ikummatissanullu Pisortaqarfiup ulloq 1. juni 2012 aammalu ulloq 4. juli 2012 GM-imut uppernarsarmagu. GM-ip tamanna tunngavigalugu pīaanissamut akuersissummik qinnuteqaammik tunniussinissamut akuersaanngilluinnarnissamik politikkeqarnerup atorunnaarsinneqarsimanissaa tunngavissaatinneqartoq, ulloq 19. oktober 2012 Aatsitassanut Ikummatissanullu Pisortaqarfimmut uppernarsarpaa. Tassunga atatillugu aamma innersuussutigineqarpoq, akuersaanngilluinnarnissamik politikkeqarnerup atorunnaarsinneqarnissaa sioqqullugu, Inuussutissarsiornermut Aatsitassanullu Naalakkersuisup, Jens-Erik Kirkegaardip, ulloq 17. september 2013 apeqquteqaammut nr. 167-imut akissutaani allassimasoq, aatsitassarsiorluni misissuinissamut akuersissutit atuuttut, uranimut pinngortitamiittut annertussutsit

sinnerlugit pinngoqqaatinik qinngornernik ulorianartunik akulinnut tunngassuteqartut, atugassarititaasut peqatigisaanik piiaanissamut akuersissummut pisinnaatitsinngitsut, tunngavigalugit tunniunneqarsimasut.

GM-ip taamaalilluni pinngoqqaatinik qinngornernik ulorianartunik akulinnik piiaanissamut akuersissummik pissarsinissamik inatsisitigut pisinnatitaaffeqartoqarsimanngitsoq imaluunniit pisinnaatitaaffeqartoqanngitsoq ilisimareeraluarlugu suliassaq ingerlatiinnarsimavaa, tamannalu aamma GM-ip allakkiaani 19. oktober 2012-imeersumi aamma 6. november 2014-imeersumi akuersaarneqarpoq.

Naalakkersuisoqarfiup aammattaaq 15. december 2021 aamma 8. februar 2022 ataatsimiinnerni, qinnuteqaat maannakkutut iluseqartillugu aalajangiusimaneqaannassappat, GM-ip piiaanissamut akuersissummik qinnuteqaatip itigartinneqarnissaa naatsorsuutigisariaqaraa, GM ilitsersorpaa.

Matuma siuliani allassimasut tunngavigalugit taamaalilluni inerniliisoqarsinnaavoq, GM aamma tamatuma kingorna suliap ingerlanerani tunngaviusumik inatsimmi § 73 malillugu illersugaasunik piginnittussaataaffilerneqarsimanngitsoq. GM-ip maannamuugallartoq tusarniaanermut akissuteqaataani 17. februar 2023-meersuni allassimasut allatut inerniliinermik malitseqarsinnaanngillat.

Naalakkersuisut tamanna tunngavigalugu qinnuteqaat 17. juni 2019-imeersoq itigartippaat, tassami akuersissummik tunniussinissaq uranimut inatsimmi § 1, imm. 1-imik unioqquitsinerusussaat.

Naalakkersuisut tamatumani qinnuteqaat avatangiisinik allanngutsaaliuineq, silap pissusaanik allanngutsaaliuineq aamma pinngortitamik illersuineq pillugit aatsitassanut ikummatissanullu inatsimmi maleruagassat kiisalu GM-ip VVM-imut nassuiaataa aamma VSB-imut nassuiaataa tusarniaanermut akissuteqaatit tiguneqartut ilanngullugit, tunngavigalugit akuerineqarsinnaassanersoq, isummerfiginngilaat.



Inussiarnersumik inuulluaqqusillunga  
Kind regards

Aqqaluaq B. Egede  
Naalakkersuisoq  
Departementet for Råstoffer  
og Justitsområdet

Jørgen T. Hammeken-Holm  
Departementschef  
Departementet for Råstoffer  
og Justitsområdet

MOOREAU TRANSLATION